

Երեւոնյա այսպէս

ՄԱՅՐ ԱԹՈՒ ՍՈՒՐԲ ԷԶՍԻԱՃՆԻ
ԿՐՈՆԱԿԱՆ, ՄՇԱԿՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց

Օգոստոսի 4-ին **ՀՀ-ում ԵՄ դեսպան Անդրեա Վիկտորինին**

Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսն ընդունեց Հայաստանի Հանրապետությունում դիվանագիտական առաքելությունն ավարտող Եվրոպական միության պատվիրակության ղեկավար, ԵՄ դեսպան Անդրեա Վիկտորինին:

Վեհափառ Հայրապետն իր գնահատանքը բերեց դեսպանին՝ հայ ժողովրդին մատուցած ծառայության ու Եվրամիության Լեռնային Ղարաբաղի հիմնախնդրի խաղաղ կարգավորմանն ուղղված ջանքերի համար: Նորին Սրբությունը, անդրադառնալով Ադրբեյջանի ռազմատենչ կեցվածքին, ծավալապաշտական նկրտումներին, ինչպես նաեւ վերջինիս՝ ՄԱԿ-ի Միջազգային արդարադատության դատարանի՝ Բերնի միջանցքի արգելափակումը վերացնելու որոշման անտեսմանն ու Կարմիր խաչի մարդասիրական առաքելության իրագործման խոչընդոտմանը, կարեւոր նկատեց ԵՄ եւ միջազգային կառույցների առավել խիստ միջոցների գործադրումը՝ զսպելու Ադրբեյջանի նմանօրինակ դատապարտելի գործողությունները: Ըստ Վեհափառ Հայրապետի՝ այս իրողությունը ցույց է տալիս, որ Արցախի ժողովուրդը չի կարող ապրել Ադրբեյջանի կազմում, եւ պետք է հարգվի արցախահայության ազատ եւ անկախ ապրելու իրավունքը:

Նորին Սրբությունը ողջունեց նաեւ Եվրոպական միության՝ Հայաստանում տարբեր ոլորտներում իրականացնող ծրագրերը:



Իր հերթին ԵՄ պատվիրակության ղեկավար Անդրեա Վիկտորինը Հայոց Հայրապետին ներկայացրեց Հայաստանում ծավալած իր գործունեությունը՝ մասնավորապես անդրադառնալով անվտանգային, մարդասիրական, հասարակական եւ կրթական ոլորտներում պատվիրակության գործադրած ջանքերին:

Զրույցի ընթացքում կողմերն անդրադարձան Լեռնային Ղարաբաղի հակամարտության խաղաղ կարգավորման կարելիությանը, քննարկեցին Արցախում ստեղծված հումանիտար աղետի, Հայաստանում եւ Արցախում առկա անվտանգային խնդիրների հաղթահարման ուղիները:



ԱՄՆ հայոց արեւելյան թեմի ուխտավորներին

Ամենայն Հայոց Կաթողիկոսն ընդունեց ԱՄՆ հայոց արեւելյան թեմի ուխտավորներին՝ ուղեկցությամբ Ֆիլադելֆիայի Սուրբ Երրորդություն եկեղեցու հոգեւոր հովիվ Տ. Հակոբ քին: Գետրոյանի:

Տեր Հակոբը, հայցելով Նորին Սրբության օրհնությունը, ներկայացրեց ուխտավորաբար Մայր Աթոռ ժամանած հայորդիներին:

Վեհափառ Հայրապետը, իր սերն ու օրհնությունը բերելով ուխտավորներին, կա-

րեւորեց աշխարհասփյուռ հայոց թեմերից դեպի Հայաստան եւ Մայր Աթոռ Սուրբ Էջմիածին նման ուխտագնացությունների կազմակերպումը, ինչը հնարավորություն է ընձեռում հայորդիներին ճանաչելու Մայր հայրենիքը եւ հաղորդ դառնալու հոգեւոր, մշակութային ժառանգությանը:

Հանդիպմանն անդրադառնալով Հայաստանում տիրող իրավիճակին ու Արցախի շրջափակմանը՝ Ամենայն Հայոց

Կաթողիկոսն ԱՄՆ հայոց արեւելյան թեմի ուխտավորներին հորդորեց իրենց երկրում բարձրաձայնել եւ իշխանություններին ներկայացնել տարածաշրջանում առկա կացությունն ու հետեւողական ջանքեր գործադրել արցախահայության անվտանգ կյանքի, ազատ եւ անկախ ապրելու իրա-

վունքի պաշտպանության համար: Վերջում Հայոց Հայրապետը պատասխանեց ուխտավորների հարցերին, որոնք վերաբերում էին Մայր Աթոռի կողմից իրականացվող Հայաստանում եւ Արցախում առկա մարտահրավերների հաղթահարմանն ուղղված ծրագրերին:



Օգոստոսի 6-ին **Արգենտինահայ դպրոցականներին**

Ամենայն Հայոց Կաթողիկոսը Մայր Աթոռ Սուրբ Էջմիածնում ընդունեց Արգենտինայի հայոց թեմի «Սուրբ Գրիգոր Լուսավորիչ» եւ «Դերմակյան» դպրոցների ավարտական դասարանների աշակերտներին:

Նորին Սրբությունը, իր հայրական օրհնությունն ու սերը փոխանցելով Արգենտինայից ժամանած հայորդիներին, գոհունակությամբ արձանագրեց, որ արգենտինահայ գաղութն աչքի է ընկում առանձնահատուկ կազմակերպվածությամբ, հայ կյանքի եւ ազգային արժեքների նախանձախնդիր պահպանմամբ:

Հանդիպմանը Հայոց Հայրապետը նաեւ

իր գնահատանքը հայտնեց դպրոցների հոգաբարձուներին, տնօրենությանն ու մանկավարժներին՝ աշակերտներին հայեցի կրթելու եւ դաստիարակելու գործում ներդրած ջանքերի համար:

Վերջում Ամենայն Հայոց Կաթողիկոսը հորդորեց ավարտական դասարանների սաներին հայրենիքով խանդավառված ու ոգեւորված լծվել արգենտինահայ համայնքի առավել զորացման գործին, իրենց անսասան հավատքով հաղթահարել ժամանակակից մարտահրավերները եւ պահպանել ազգային գիտակցությունն ու ոգին:

Օգոստոսի 7-ին **Իրանի Իսլամական Հանրապետության Նորանշանակ դեսպանին**

Ամենայն Հայոց Կաթողիկոսն ընդունեց ՀՀ-ում Իրանի Իսլամական Հանրապետության արտակարգ եւ լիազոր դեսպան Մեհդի Սոքհանին:

Նորին Սրբությունը ողջունեց դեսպանին՝ շնորհավորելով նշանակման կապակցությամբ եւ մաղթելով արդյունաշատ ծառայություն: Ամենայն Հայոց Կաթողիկոսն ընդգծելով, որ նորանշանակ դեսպանի առաքելությունը համընկել է հայ ժողովրդի համար դժվարին ժամանակաշրջանին՝ իր գնահատանքը հայտնեց Իրանի Իսլամական Հանրապետությանը պատերազմի եւ հետպատերազմյան այս ծանր շրջանում Հայաստանին ցուցաբերվող զորակցության համար:

Հանդիպմանը Վեհափառ Հայրապետն անդրադարձավ նաեւ հայ-իրանական դարավոր փոխհարաբերություններին եւ երկու երկրների ներկայիս համագործակցությանը: ➔ էջ 2



Ամենայն Հայոց Կաթողիկոսն ընդունեց

Իրանի Իսլամական Հանրապետության Նորանշանակ ղեսպանին

← էջ 1

Գոհունակություն հայտնելով իրանահայ համայնքի հանդեպ Իրանի իշխանությունների կողմից ցուցաբերվող ուշադրության համար՝ Ամենայն Հայոց Կաթողիկոսը միաժամանակ բարձր գնահատեց հայկական մշակութային արժեքների ու սրբությունների նկատմամբ դրսևորվող հոգածու վերաբերմունքը:

Զրույցի ընթացքում Նորին Սրբությունն անդրադարձավ Ադրբեջանի վերահսկողության տակ անցած տարածքներում հայկական հոգեւոր ու մշակութային ժառանգության յուրացման փորձերին եւ ոչնչացման փաստերին, ինչպես նաեւ, իշխանությունների ուղղորդմամբ, կրոնական ու մշակութային արժեքների նկատմամբ դրսևորվող հանցավոր գործողություններին: Հայոց Հայրապետն այս առնչությամբ դատապար-

տելի նկատեց նաեւ օրերս Ղուրամի այրման միջադեպը:

Իր հերթին ղեսպան Մեհդի Սոբհանին, խոսելով առաջիկա անելիքների մասին, կարեւորեց երկու ժողովուրդների բարեկամական կապերի զարգացման գործում նաեւ միջկրոնական երկխոսությունը: Պարոն Սոբհանին, անդրառնալով տարածաշրջանային իրավիճակին, ընդգծեց հակամարտությունների խաղաղ կարգավորման անհրաժեշտությունը:

Զրուցակիցներն անդրադարձան նաեւ Մայր Աթոռի եւ Իրանի Իսլամական Հանրապետության միջեւ առկա փոխգործակցային հարաբերություններին՝ կարեւորելով մշակույթի ոլորտում համագործակցությունը, կրոնական երկխոսությունը, միջկրոնական համաժողովների կազմակերպումը:



Օգոստոսի 8-ին Մաշտոցյան Մատենադարանի տնօրենին եւ փոխտնօրենին

Ամենայն Հայոց Կաթողիկոսն ընդունեց Մեսրոպ Մաշտոցի անվան Մատենադարանի նորընտիր տնօրեն Արա Խզմալյանին եւ գիտական գծով փոխտնօրեն Վահե Թորոյանին:

Նորին Սրբությունը, շնորհավորելով Մատենադարանում նոր պաշտոնների ստանձման առիթով, նրանց մաղթեց արդյունաշատ գործունեություն՝ ի պայծառություն եւ ի փառս Մաշտոցյան Մատենադարանի:

Վեհափառ Հայրապետն ընդգծեց, որ Մատենադարանն ազգային հպարտության ամենամիլիարդական կենտրոններից է՝ իր ձեռագրական ժառանգությամբ հանդիսանա-

լով համամարդկային գիտական եւ իմացական մտքի զարգացման աղբյուր:

Իր հերթին պարոն Խզմալյանը Նորին Սրբությանը ներկայացրեց Մատենադարանի զարգացմանն ուղղված տեսլականը եւ առաջիկա ծրագրերը՝ կարեւորելով նաեւ Հայ եկեղեցու աջակցությունը:

Զրույցի ընթացքում քննարկվեցին համագործակցության ուղիները, մեծապես կարեւորվեց ձեռագրագիտական, աղբյուրագիտական եւ թարգմանական առավել բեղուն աշխատանքի իրագործումը: Առաջնահերթ խնդիր համարվեց հայկական ձեռագրերի վերադարձը հայրենիք:

«Մայր Հայաստան» շարժման համակարգողին

Ամենայն Հայոց Կաթողիկոսն ընդունեց «Մայր Հայաստան» շարժման համակարգող Անդրանիկ Թեւանյանին:

Հանդիպման ընթացքում անդրադարձ կատարվեց Հայաստանի եւ Արցախի առջեւ ծառացած հիմնախնդիրներին ու անվտանգային մարտահրավերներին, կարեւորվեց դրանց հաղթահարման համար համագործակցային միասնականության անհրաժեշտությունը: Խոսվեց նաեւ առկա իրավիճակում Հայ եկեղեցու կողմից ձեռնարկվող քայլերի մասին:

Հանդիպման ավարտին Նորին Սրբությունը մաղթեց Աստուծո օգնականությունն ու պահպանությունը մեր հայրենիքին եւ ժողովրդին:



Կ. Պոլսի «Մարալ» երգի-պարի անսամբլի անդամներին

Ամենայն Հայոց Կաթողիկոսն ընդունեց Կ. Պոլսի հայկական «Մարալ» երգի-պարի անսամբլի՝ ուխտավորաբար Հայաստան ժամանած անդամներին:

Հայրապետական իր օրհնությունը բերելով ուխտավորներին՝ Նորին Սրբությունը գոհունակություն հայտնեց պոլսահայերի Մայր Աթոռ այցի առիթով: Հայոց Հայրապետը հաստատեց, որ Կ. Պոլսի հայոց պատրիարքությունը մեծ դերակատարություն է ունեցել ազգային, մշակութային, հոգեւոր ու բարոյական արժեքների պահպանման գործում:

Ամենայն Հայոց Կաթողիկոսը նշեց նաեւ, որ մշտապես տեսել է պոլսահայ համայնքի

զորավոր հավատքը եւ անվերապահ սերը Մայր Աթոռ Սուրբ Էջմիածնի նկատմամբ: Նորին Սրբությունը, վերհիշելով իր հովվապետական այցը Կ. Պոլիս, ուրախությամբ արձանագրեց, որ հակառակ բոլոր տեսակի դժվարություններին ու փորձություններին՝ պոլսահայերն ամուր եւ պահել իրենց հավատքը, սրբություններն ու ազգային ինքնության գիտակցությունը:

Վերջում Ամենայն Հայոց Հայրապետը բարենաղթեց պոլսահայ ուխտավորներին, որ Աստուծո օրհնության ներքո ապրեն խաղաղ եւ ապահով, պահպանեն հայրենի ժառանգությունն ու առավել շենացնեն պոլսահայ կյանքը:

Հայ եկեղեցու հայաստանաբնակ եռիսկոռոսների հայտարարությունը

Արցախի շարունակվող ամբողջական շրջափակումը, դրա հետեւանքով ստեղծված աղետալ ծայրահեղ իրավիճակը, ինչը ցեղասպանության դասական դրսևորում է, անելանելիության ծանր զգացումներով են համակել մեր ժողովրդին:

Արցախում սննդամթերքի, դեղորայքի եւ կենսական այլ առաջնահերթ անհրաժեշտությունների խիստ սակավության պայմաններում ամեն օր տեղեկանում ենք մարդկանց, այդ թվում՝ մանուկների, հղիների եւ հիվանդների առողջական վիճակի կտրուկ վատթարացման եւ մահվան ցավալի դեպքերի մասին: Ամբողջական շրջափակմանը զուգահեռ՝ ադրբեջանական իշխանությունները շարունակում են իրականացնել նաեւ ահաբեկչական այնպիսի գործողություններ, որոնք էթնիկական զտումների նպատակով Արցախի ժողովրդի շրջանում միտված են մշտական վախի, հուսահատության, անապահովության զգացումներ եւ հայրենիքը լքելու տրամադրություններ առաջացնելուն: Հակամարդկային մանօրինակ գործելաոճի հերթական դրսևորումը տեղի ունեցավ բոլորովին վերջերս, երբ Ադրբեջանի իշխանությունները Բերձորի միջանցքից առեւանգեցին Կար-

միր խաչի անմիջական հովանավորության ներքո Արցախից Հայաստան փոխադրվող, առողջական ծանր խնդիրներ ունեցող Վագիֆ Խաչատրյանին՝ կոպտորեն ոտնահարելով Կարմիր խաչի անձեռնմխելիությունը, հեղինակությունն ու մարդասիրական առաքելությունը:

Մեր ժողովրդի նկատմամբ Ադրբեջանի կողմից իրականացվող թշնամական այսօրինակ գործողությունները ոճրագործություն են ոչ միայն Արցախի հայության նկատմամբ, այլեւ բացահայտ մարտահրավեր՝ ուղղված քաղաքակիրթ ողջ աշխարհին եւ միջազգային իրավասու կազմակերպություններին:

Կոչ ենք ուղղում ՄԱԿ-ի Անվտանգության խորհրդին անդամակցող պետություններին առաջնորդներին՝ ազդու միջոցներ գործադրել եւ սթափության կոչել Ադրբեջանի իշխանություններին՝ հարգելու եւ կյանքի կոչելու Միջազգային արդարադատության դատարանի սույն թվականի փետրվարի 22-ի միջանկյալ եւ հուլիսի 6-ի եզրափակիչ որոշումները՝ պարտադրելով իրաժարվել բիրտ ուժի եւ ցեղասպան գործողությունների միջոցով խնդիրները կարգավորելու գործելաոճից:

Տարածաշրջանում խաղաղություն չի կարող հաստատվել ի հաշիվ Արցախի ժողովրդի բնաջնջման կամ նրա խաղաղ, անվտանգ ու արժանապատիվ կյանքի հիմնարար իրավունքների ոտնահարման:

Խորապես մտահոգված Արցախը Ադրբեջանի կազմում ճանաչելու Հայաստանի իշխանությունների որդեգրած դիրքորոշումով՝ կոչ ենք անում գործող իշխանություններին չհրաժարվել Արցախի ժողովրդի ինքնորոշման իրավունքի պաշտպանության համար Հայաստանի Հանրապետության ստանձնած հանձնառություններից եւ համախմբել պետական ու ազգային ողջ հնարավորություններն ու ներուժը՝ ի պաշտպանություն Արցախի ժողովրդի ապահով, անվտանգ, ինքնիշխան կյանքի:

Արցախը եւ արցախահայությունը կյանք ու ապագա չունեն ցեղասպանությունը պետական քաղաքականություն հռչակած Ադրբեջանի կազմում:

Հորդոր ենք ուղղում մեր Սուրբ Եկեղեցու աշխարհասփյուռ հոգեւոր ողջ դասին, որ ազգային-եկեղեցական կառույցների իրավասու ներկայացուցիչների հետ ձեռնամուխ լինեն իրենց երկրների պետական, եկեղեցական, դիվանագիտական, հասարակա-

կան եւ լրատվական շրջանակում ներկայացնելու ադրբեջանական շարունակվող ագրեսիայի հետեւանքով Արցախում ստեղծված ծայրահեղ ծանր կացությունը՝ հասնելու համար Արցախի մեր ժողովրդի կենսական իրավունքների իրագործմանը եւ անվտանգ կյանքի ապահովմանը:

Հորդորում ենք մեր ժողովրդի զավակներին՝ հմարավոր բոլոր միջոցներով եւ ճանապարհներով միանալ Արցախի փրկության սրբազան գործին:

Աղոթում ենք Արցախի մեր ժողովրդի համար եւ հայցում Տիրոջ պահպանությունն ու զորակցությունը Արցախի մեր քույրերին ու եղբայրներին՝ ոգով աննկուն մնալու եւ վճռականությամբ ու միաբանությամբ հաղթահարելու ստեղծված ծանր իրավիճակը եւ ծառացած հիմնախնդիրները:

Թող երկնավոր Տերը խաղաղ պահի մեր հայրենիքը եւ օրհնի համայն մեր ժողովրդի ջանքերը հաճուն Արցախի եւ Հայաստանի բարօրության. ամեն:

Լրատվական նյութերը՝
Մայր Աթոռ Սուրբ Էջմիածնի
տեղեկատվական համակարգի

Սուրբ Աստվածածնի վերափոխման տոնը Մայր Աթոռ Սուրբ Էջմիածնում

Օգոստոսի 13-ին Հայաստանյայց Առաքելական Սուրբ Եկեղեցին մշտեց Սուրբ Մարիամ Աստվածածնի վերափոխման տոնը:

Բերկրառատ տոնի առիթով Մայր Աթոռ Սուրբ Էջմիածնի միաբանությունը Սուրբ Գայանե վանքում մասնակցեց պատարագի սրբազան արարողությանը: Պատարագին էր Մայր Աթոռի Եկեղեցական հայեցակարգային բաժնի տնօրեն Տ. Վազգեն արք. Միրզախանյանը: Ներկայացնելով տոնի խորհուրդը՝ պատարագի սրբազանը մասնավորապես ընդգծեց. «Աստվածամոր վերափոխումը տոնում ենք իբրեւ զալիք այն իրողության եւս մեկ հաստատում, որ մենք էլ պիտի հարություն առնենք եւ Աստվածամոր օրինակով հաղթահարենք մահը»:



Վերջում Վազգեն սրբազանը, եւս մեկ անգամ աղոթք վերառաքելով առ Աստված, դիմեց ներկա հավատացյալներին՝ մշտելով. «Սիրելի հավատացյալներ, շնորհավորելով բոլորիս տոնի առիթով՝ միանում եմ ամենքիդ աղոթքներին եւ խնդրում Աստվածամոր բարեխոսությունը մեր ազգի, Հայաստան եւ Արցախ աշխարհների համար, մեր բանակի, մեր ժողովրդի փրկության համար»: Սուրբ պա-



տարագի ավարտից հետո Եկեղեցական թափորը Սուրբ Գայանե վանքից ուղղվեց դեպի Մայր Աթոռ Սուրբ Էջմիածնի Սուրբ Տրդատի բաց խորան, որտեղ հանդիսապետությամբ Մայր Աթոռի լուսարարապետ Տ. Մուշեղ եպս. Բաբայանի՝ կատարվեց խաղողօրհնեքի հանդիսավոր կարգը: Օրհնված խաղողի ողկույզները բաժանվեցին հավատավոր ժողովրդին:

Տոն Սուրբ Աստվածածնի վերափոխման

Հայաստանյայց Առաքելական Սուրբ Եկեղեցին տոնախմբում է Սուրբ Աստվածածնին նվիրված մեծագույն՝ Վերափոխման տոնը, որը սահմանել է մեր հավատքի հայր Ս. Գրիգոր Լուսավորիչը: Համաձայն Հայոց Եկեղեցու սրբազան ավանդության՝ մեր Տեր Հիսուս Քրիստոսի խաչելությունից, հրաշափառ հարությունից տասնչորս տարի անց իր հոգին է ավանդում Սուրբ Աստվածամայրը՝ շրջապատված Տիրոջ աշակերտներով: Առաքյալները Տիրամոր մարմինն ամփոփում են Գթսեմանիի պարտեզում՝ պատանքված մարմնի վրա դնելով բրաբիոն պսակը՝ սաղմոսներ եւ օրհնություններ երգելով: Եվ այն երեք օրերին, երբ Սուրբ Աստվածամոր մարմինը գտնվում էր կնքված գերեզմանում, անդադար լսվում էին հրեշտակների՝ փառաբանության քաղցրաձայն երգերը: Երեք օր հետո՝ առավոտյան, անմարմինների բանակն իջնում է Տիրամոր գերեզմանի վրա, ապա մեր Փրկիչը՝ Հիսուս Քրիստոս, լուսափայլ ամպով եւ հրեշտակների ուղեկցությամբ մոտենում է Կույս Մարիամի գերեզմանին եւ առանց խախտելու կնիքը՝ աստվածունկալ մարմինը միավորում է հոգուն եւ վերանում երկինք: Եվ հրեշտակների ինը դասերում հերթով կայանելով՝ հարություն առած Աստվածամայրը հանգրվանում է Տիրոջ աջ կողմում՝ երկնային խորանի վարագույրի հետեւում: Սակայն նրա հուղարկավորությանը չի մասնակցում առաքյալներից Ս. Բարդուղիմեոսը: Երբ վերջինս վերադառնում է, ցանկանում է գնալ գերեզման, երկրպագել եւ խնկել Սուրբ Աստվածածնի հիշատակը: Առաքյալները զննում են եւ տեսնում թափուր գերեզմանը, քանզի Սուրբ Տիրամայրը վերափոխվել էր: Հենց այս սրբազան ավանդության հիմամբ մենք հիշատակում ենք Տիրամոր վերափոխման տոնը: Արդարեւ, Հայոց Եկեղեցում, նրա սրբազան ավանդության, հոգեւոր եւ աստվածաբանական մատենագրության մեջ չկա առավել փառաբանված, մեծարված, առավել օրհներգված սուրբ, քան Սուրբ Աստվածածինն է:

Քաջ գիտենք, թե ինչու Աստված, որպես Փրկիչ մոր, ընտրեց հենց Սուրբ Կույս Մարիամին, գիտենք նրա կյանքի՝ ծննդյան, Տաճարին ընծայման, Աստծուն անմնացորդ նվիրվելու աստվածաշնչյան վկայությունը: Սուրբ Կույս Մարիամը համեստ, հնազանդ, սրբակենցաղ եւ խոնարհ էր, ուստի Աստված, ընտրելով նրան, ուղարկեց Գաբրիել հրեշտակապետին՝ նրան ավետելու. «Ահա կույսը պիտի հղիանա եւ մի որդի պիտի ծնի, եւ նրան պիտի կոչեն Եմմանուէլ, որ նշանակում է Աստված մեզ հետ» (Մատթ. Ա 23):

Եթե առաջին կնոջով՝ նախամայր Եվայով, մեղքն ու դատապարտությունը մտան մարդկային կյանք, ապա



Աստվածամոր կերպարով (երկրորդ Եվա) ուղենշվեց մարդկության փրկության ճանապարհը: Սուրբ Աստվածամայրը դարձավ ոսկե տապանակ, ինչպես շարականագիրն է վկայում, որից եւս հայտնվեց համայն մարդկության ճշմարիտ Լույսը՝ մեր Տեր Հիսուս Քրիստոս՝ իբրեւ փրկություն, ճանապարհ եւ հավիտենական կյանքը հավատքով ժառանգելու ճշմարիտ դուռ:

Դեռատի օրիորդ Մարիամը հնազանդվում է Տիրոջ կամքին, եւ երբ ժամանակը գալիս է, դառնում է Աստվածամայր՝ լույս աշխարհի բերելով մարդկության Փրկիչին, կրում է բոլոր դժվարությունները եւ յոթ վերքերը չսպիացած՝ ապրում մեր փրկության համար՝ իր Ձավակի փրկչական առաքելության գիտակցումով:

Հիշենք աստվածաշնչյան այն հատվածները, թե ինչ դառնությամբ է լցվում Աստվածամոր հոգին, երբ կորցնում է տասներկուամյա զավակին, մինչեւ որ գտնում է Նրան Տաճարում, մայրական ինչպիսի անասելի տառապանքով, բայց միաժամանակ խոնարհությամբ է Աստվածամայրը հետեւում Տիրոջ խաչելությանը՝ ընկալելով Նրա գոհողության, խաչի, փրկության եւ սիրո Ավետիսը:

Ուշագրավ է նաեւ Քրիստոսի եւ Տիրամոր հարաբերությունը: Երբ մի անգամ միասին ներկա էին հարսանեկան արարողության Գալիլիայի Կանա քաղաքում, խնջույքի ընթացքում գինին վերջանում է (հմտ. Հովհ. Բ 1-11): Աստվածածինը մայրում է իր Որդուն. Քրիստոս դեռեւս չէր սկսել հրաշագործությունները, չէր ավետել աշխարհին, որ հնքն է Աստծու Որդին, սակայն Աստվածամայրը գիտեր այդ մասին, քանզի ինքն էր Գաբրիել հրեշտակապետից ավետումն ստացել: Տիրամայրը, մայելով իր Որդուն, խնդրում է Նրան օգնել այդ մարդկանց: Քրիստոս նրան պատասխա-

նում է. «Ինչ ես ուզում ինձնից, ով կին, իմ ժամանակը դեռ չի հասել» (Հովհ. Բ 4): Քրիստոս կարծես անդրադառնում է այն իրողությանը, որ այդ կինն իր մայրն է, եւ նա լինելու է ողջ մարդկության մայրը. ամփոփալես պատվիրում է տալանները ջուր լցնել եւ այդ ջուրը փոխարկում է գինու:

Սուրբ Տիրամոր վերափոխումը Փրկչի հրաշափառ հարությունից հետո մահկանացուի վերափոխման առաջին դեպքն էր: Աստվածամայրը մահվանից հետո երրորդ օրը հարություն է առնում, պատանքները թողնում է գերեզմանում եւ հրեշտակների ինը դասերում կայանելով՝ բարձրանում երկինք: Դրա համար Հայ Եկեղեցին Վերափոխման տոնը մշտում է ինձ օր շարունակ:

Վերափոխումը նախ սրբության հաղթանակի տոն է, քանզի Աստվածածինը մանուկ հասակից իրեն նվիրաբերեց Աստծուն, ապրեց սրբակենցաղությամբ եւ աստվածամոր պատվիրաններին հետեւելով: Ընդհանրական Եկեղեցու հայրերը Տիրամորը համեմատում են տապանակի հետ. տապանակ, որ Հիմ Իսրայելի, Հիմ Ուխտի ժողովրդի կյանքում խորհրդանշում էր Աստծու ներկայությունը, որտեղ պահպանվում էին տասնաբանյա պատվիրանները, որոնք Արարչի եւ արարված մարդու միջեւ կապի խորհրդանշին էին: Սուրբ Աստվածամայրն այն կենդանի տապանակն էր, որ կրում էր մարդեղացյալ Բանին՝ Աստծու Միածին Որդուն, Որը դառնում է մեղանչական մարդկությանը երկնային Հորը մոտեցնող իրական կամուրջ, վերացնում է բոլոր անջրպետները, խոչընդոտները, որոնք մարդուն հեռացնում էին Աստծուց:

Մեզ՝ հայերիս համար Վերափոխման տոնը մեկ այլ մշակությունն է եւս ունի. Ս. Բարդուղիմեոս առաքյալը, Սուրբ Աստվածամոր անձեռակերտ պատկերը բերելով Հայաստան, մեծամեծ հրաշքներ է գործում մեր աշխարհում: Որքան մեծ է ամենագուր Աստծու սերը մեր ժողովրդի հանդեպ, որ Ս. Թադեոս առաքյալի միջոցով էլ տիրամուխ Գեղարդն է Հայոց աշխարհի բերվում:

Հայոց Եկեղեցու դարավոր ավանդույթի համաձայն՝ Վերափոխման տոնին բոլոր Եկեղեցիներում կատարվում է մեր երկրի առաջին հասունացող պտղի՝ խաղողի օրհնությունը, որպեսզի խաղողի հյութով պատրաստված գինով մեր Տերն իջնի Սուրբ Հաղորդության խորհրդի մեջ եւ սրբազործելով՝ առատորեն բաշխվի քրիստոնյաներիս՝ որպես կատարյալ փրկություն: Օրհնելով խաղողը՝ օրհնվում է նաեւ Հայոց հողը, որ այն բերրի լինի, ապահով լինեն մեր հայրենիքի սահմանները, մեր կյանքը, որ քրիստոնեական գիտակցությամբ «հանդիպեն ողորմությունն ու ճշմարտությունը, համբուրվեն արդարությունն ու խաղաղությունը», ինչպես Դավիթ մարգարեն է ասում իր սաղմոսում (Սաղմ. 27 11): Օրհնելու նպատակով ընտրվել է խաղողը՝ որպես տարվա բերքի խորհրդանշ, քանզի մեր Տեր Հիսուս Քրիստոս խաղողի որթը պատվեց՝ հայտնելով. «Ես եմ ճշմարիտ որթատունկը» (Հովհ. ԺԵ 1): Այդ որթատունկի պտղի՝ խաղողի հյութն էր, որ Հիսուս օրհնեց «որպես Նոր Ուխտի» իր արյուն (հմտ. Մատթ. ԻԶ 28), որով ամենքս զնվեցինք ու ազատագրվեցինք մեղքի ծառայությունից ու մահից եւ մոր կյանք ունեցանք: Փորձենք այս մեծախորհուրդ տոնը պարզ գիտելիքի եւ հիշատակության սահմանից իրական վերափոխման տոնի վերածել՝ աղոթելով, որ Սուրբ Աստվածածինը դառնա մեր բարեխոս Մայրը, որ նրա միջնորդության եւ բարեխոսության արդյունքում մեր Տերն ու Փրկիչը թագավորի մեր կյանքում, եւ այն դառնա Տիրոջ փառաբանության ճշմարիտ ընթացք:

Սուրբ Աստվածամոր մշտամրմունջ բարեխոսությամբ թող Տերն ամենքիս պարգևի շնորհք, սեր եւ խաղաղություն:

Շարական Սուրբ Աստուածածնի վերափոխման

Իրենց գերարքիին եւ օթարան լուսածին, շանմայր ծնեալն առաջին ծնար անհայր յերկրորդին. Բարեխոսեալ Միածնին, Աստուածածին Մայր Բանին:

Բանին Հոր մարմնարան եւ առագաստ բնակութեան. Որ կաթամբ կուսական Կերակրեցեր զեակն Բան. Բարեխոսեալ Միածնին, Աստուածածին Մայր Բանին:

Բերագոյն սրբութեամբ եւ կուսական մաքրութեամբ, Բարձեր զանհասն բնութեամբ Ի գիրկս ջո սննդեամբ. Բարեխոսեալ Միածնին, Աստուածածին Մայր Բանին:

Ու ծաղիկ անթառան Տոհմի սեռիս մարդկութեան, Եւ շառափող օրհնութեան Նախնու ծնողին մեր բնութեան. Բարեխոսեալ Միածնին, Աստուածածին Մայր Բանին:

ՅԱԿՈԲ ՊԱՏՐԻԱՐԻՔ ՆԱԼԵԱՆ ՔՐԻՍՏՈՆԷԱԿԱՆ ՈՒՍԱՆԵԼԻ

Սկիզբը՝ թիւ 9–14

Հաւատքի աստիճաններուն մեկնութիւնը

ԺԱ

Տասնմէկերորդ աստիճանն այս էր. *մեղքերու թողութեան*. այս մէկը մեր Սուրբ առաքեալը՝ Թադէոսն ըսաւ:

Ասիկա մեզի կը սովորեցնէ, թէ ինչպէս Աստուծոյ կը հաւատաւոր ամենակարող, որ ոչինչէն ամէն ինչ գոյութեան բերաւ՝ ստեղծելով, այդպէս ալ կրնայ մեղքերուն թողութիւն տալ, որովհետեւ ո՛րք կրնայ մեղքերը ներել՝ բացի Աստուծմէ:

Աստուած այս կարողութիւնը եկեղեցւոյ ու քահանաներուն յանձնած է. քահանան, Աստուծոյ դեսպանն ըլլալով, խոստովանող մեղաւորին մեղքերը կը ներէ:

Հաւատքի այս աստիճանը մեղաւորներուն համար յոյս է, որպէսզի առանց զղջալու չմեռնին՝ ըսելով, թէ գործուած մեղքերուն համար թողութիւն չըլլար: Այսպէս ըսողը յայտնապէս հերետիկոս է, որովհետեւ հաւատքի այս մասնիկը կ'ուրանայ, որ է մեղքերուն թողութիւնը:

Սուրբ Թադէոսը փայլուն յակիմք, կապուտակ երկնագոյն.

Մեր մեղքերուն, որ անհուն են, ներումի հաստատուն յոյս կու տայ:

ԺԲ

Տասներկրորդ աստիճանն այս է. *մարմիններու յարութեան եւ յաւիտենական կեանքին*. այս մէկը Մատաթիան ըսաւ:

Ասով կ'ուզէ ըսել, թէ Քրիստոս Աստուած՝ Իր ամենակարողութեամբ, Ադամին այս հողացեալ բնութիւնը պիտի յարուցանէ՝ սուրբերը վարձատրելու համար, իսկ մեղաւորները՝ պատժելու: Քանի որ մինչեւ այն ատեն արդարներն ու մեղաւորները մարմիններու յարութեան կը սպասէին. թէ մեղաւորները մարմիններու յարութիւնը չէին ուզեր, քանի որ գիտէին, որ իրենք դատապարտուած են: Արդարեւ, սուրբերուն յաւիտենական կեանքը կը տրուի, իսկ մեղաւորներուն դատապարտութիւն, յաւիտենական տանջանք եւ աստուածատեսութենէ զրկուիլ կը տրուի: Քանի որ ինչքան

փառքով ու պատիւով արդարները կը պատկուին, այդքան պատիժով մեղաւորները կը պատժուին՝ հակառակ սուրբերու փառքին, քանի որ սուրբերը յաւիտենական կեանքը՝ Աստուծոյ տեսութիւնը կը ժառանգեն, իսկ մեղաւորները՝ յաւիտենական մահը եւ աստուածատեսութենէն կը զրկուին:

Երկրորդ՝ սուրբերն աչքերով կը խնդան տեսնելով զՔրիստոս Աստուած, իսկ մեղաւորները կու լան եւ կ'արտասուեն՝ սաղայէլին գարշելի պատկերը տեսնելով:

Երրորդ՝ սուրբերը երանին կը լսեն, իսկ մեղաւորները միշտ կը լսեն, թէ՛ հեռացէք Ինձմէ, դուք՝ անիծուածներ:

Չորրորդ՝ սուրբերը Սողոմոն Իմաստունն աւելի իմաստուն կը դառնան, իսկ մեղաւորները յիմար կոյսերուն եւ անասուններուն մօտ կ'ըլլան:

Հինգերորդ՝ սուրբերն անշարժարելի մարմին կը վայելեն՝ պայծառ, նօսր ու թեթեւ, իսկ մեղաւորներն ատոնց հակառակ՝ չար-չարելի մարմին, սեւ ու գարշելի, թանձր եւ ծանր մարմին, որ կապարի ու փամփուշտի մօտ դժոխք պիտի իջնէ, ինչպէս Դաւիթն ըսաւ, թէ՛ անոնք կապարի մօտ սաստիկ ջուրերուն մէջ պիտի իջնեն:

Վեցերորդ՝ սուրբերն Աստուծոյ սիրով կը ջերմանան, իսկ մեղաւորները ցուրտէն կը պաղին ու իրենց ակռաները կը կրճտեն:

Եօթներորդ՝ սուրբերն ամբողջ մարմինով ու հոգիով կը փառաւորուին, կը խնդան ու կը զուարճանան իրեշտակներու ընկերակցութեամբ, իսկ մեղաւորները անքուն որդերէն կը տանջուին եւ կը չարչարուին:

Սակայն ինչպէս արքայութեան փառքն անտեսանելի է աչքերուն ու անլսելի ականջներուն եւ միայն հաւատքով կ'ըմբռնուի, այդպէս ալ դժոխքի տանջանքներն անտես ու անլուր են, ու միայն հաւատքով գիտենք, որ յաւիտենական տանջանք ու աստուածատեսութենէ զրկում է:

Մատաթիան ամթիստ (թանկագին) քար, ծիրանագոյն եւ մեղեխիկ, Մարմիններու յարութեան քեզի յուշարար, կեանքը ստանալ անմահաբար:

Ութերորդ հարցում. *յոյսի մասին, որ աստուածաբանական երկրորդ առաքինութիւնն է:*

Յոյսն ստոյգ սպասում եւ աներկբայ ակն-

կալութիւն է հանդերձեալ երանութեան՝ յառաջ եկած Աստուծոյ շնորհներէն ու բարի գործերէն: Յոյսով է, որ կ'ակնկալենք զԱստուած տեսնել ու վայելել Անոր խոստացած բարիքները: Քանի որ ինչպէս հաւատքն անտեսանելիներուն ճանաչումն ու իմաստուն եւ, այդպէս ալ յոյսը անտեսանելիներուն ըմբռնումն է, քանի որ տեսած բանին վրայ յոյս ու ակնկալութիւն չըլլար: Քանի որ մարդ, եթէ բան մը տեսնէ, ինչո՞ւ այլեւս յուսայ, կ'ըսէ Պօղոս առաքեալը, այլ ինչ որ չենք տեսներ, այդ բաներուն կը յուսանք, համբերութեամբ կ'ակնկալենք, իսկ Սուրբ Հոգին մեր միտքի տկարութեան օգնական կ'ըլլայ եւ մեր միտքին կը հաճեցնէ Աստուծոյ խոստացածները ստուգապէս վայելել, եթէ մենք ալ ջանք ընենք, աշխատինք:

Արդարեւ, յոյսն աներկբայ է կ'ըսուի այն պատճառով, որ յոյսը ինչ բանէ կախուած է փրկութիւնը, կարծես թէ երկինքէն կախուած շղթայ մըն է, որ մեզ երկինք կը բարձրացնէ: Եւ ինչպէս որ շղթայով կապուածը չի կրնար արձակուիլ, այսպէս ալ յոյսով հաստատուածը չի կրնար առաքինութենէն ու բարի գործերէն արձակուիլ: Իսկ հանդերձեալ երանութիւն անոր համար կ'ըսէ, որովհետեւ կատարեալ եւ ուղիղ յոյսն այն է, որ ապագայ երանութեան եւ Աստուծոյ տեսութեան համար կ'ըլլայ: Եւ մենք յոյս ունինք, թէ Քրիստոսի մարդեղութեամբ Աստուծոյ որդիներ եղանք ու Յիսուսի եղբայրներ, իսկ ինչ որ ժառանգութիւնը որդիներուն բաժինն է: Հետեաբար՝ եթէ մենք այլեւս Աստուծոյ որդիներ ենք ու որդիաբար կ'ապրինք, մեր եղբօր՝ Քրիստոսի հետ ժառանգորդ կը դառնանք արքայութեան, այսինքն՝ հանդերձեալ երանութեան:

Աստուծոյ շնորհներէն յառաջացած անոր համար կ'ըսէ, որովհետեւ յոյսն այնպիսի բաներու վրայ է, որ մեր տկար միտքը չի կրնար տանիլ եւ իմանալ, թէ Աստուած ինչպիսի բարիք պատրաստ է մեզի. անոր համար կը կարօտինք Աստուծոյ շնորհներուն եւ ողորմութեան, որոնք կը յուսաւորեն ու կը զօրացնեն մեր կամքը՝ աներկբայ ընդունելու Աստուծոյ խոստացած բարիքները:

Դարձեալ՝ հանդերձեալ երանութիւնը մեզի երկու բանէ կը պարգևտուի. առաջին՝ Աստուծոյ շնորհներէն, եւ երկրորդ՝ մեր բարի գործերէն, քանի որ առանց Աստուծոյ շնորհներուն վայ մեր գործերուն, որովհետեւ այդ-

պիսի գործերը՝ առանց Աստուծոյ շնորհներուն, կարծես թէ մեռելի աչք են, որ չեն տեսներ եւ կամ կը մնանին այն աչքերուն, որոնք առողջ կ'երեւին, բայց չեն տեսներ, ու այսպէս են մեր գործերը՝ առանց Աստուծոյ շնորհներուն: Իսկ բարի արդիւնքներուն այն պատճառով կ'ըսէ, որովհետեւ առանց աշխատանքի ո՛ր մէկ բանուոր յոյս կ'ունենայ օրական առնելու. յանդուգն ու զոդ է այնպիսի մարդը, որ չորած բանը կ'ուզէ վերցնել:

Սակայն յոյսին մասին քեզի դիւրին օրինակ մը տամ, որպէսզի միտքդ հանգստանայ: Ըսենք, թէ պարտէզ մը ունիս. կը տեսնես, որ երկինքէն անձրեւ կու գայ պարտէզիդ վրայ: Կ'ուրախանաս, թէ տեսակ-տեսակ պտուղներ եւ ծաղիկներ պիտի բուսնին պարտէզիդ մէջ, սակայն եթէ դուն հունտ ցանած չըլլաս ու տունկ տնկած չըլլաս, երկինքէն եկած անձրեւէն քեզի ինչ շահ կայ: Այսպէս ալ հաւատքով հաւատացիր, թէ արքայութիւն կայ, եւ Աստուած զայն խոստացած է քեզի: Աստուծոյ այս խոստումը յոյս մը եղաւ սիրտիդ մէջ: Աստուած ըսաւ, թէ քեզի այս արքայութիւնը պիտի տամ, եթէ բարեգործ եղար: Իսկ եթէ դուն երբեք ինչ չըրիր սուրբ ու առաքինի ըլլալ, այլ չար ճանապարհներէ գացիր, եթէ յոյս ալ ունենաս, քեզի շահ չկայ, որովհետեւ ուզեցիր, որ ճրագդ առանց իւղի՝ սովորական ջուրով վառես, որ կարելի չէ: Սակայն եթէ Աստուծոյ խոստացածին հաւատացիր ու գործերովդ մաքրուեցար, ահա՛ յուսացածիդ հասար:

Արդ, նախ եւ առաջ մեր յոյսն ու ապաւնէն Աստուած է:

Երկրորդ՝ Տիրամայր Սուրբ Աստուածածինը, քանի որ ան է Սուրբ Լոյսին մայրը:

Երրորդ՝ իրեշտակներուն բարեխօսութիւնը: Չորրորդ՝ սուրբ առաքեալները:

Հինգերորդ՝ սուրբ մարտիրոսները: Վեցերորդ՝ սուրբ կոյսերը:

Եօթներորդ՝ Քրիստոսի սուրբ խոստովանողները եւ արքայութեան բոլոր որդիները:

Աստուծոյ կատարելապէս ան կը յուսայ, ով իր գործերով սուրբ կ'ըլլայ,

եւ կը յուսայ անթերի ստանալ Աստուծոյ խոստացածը:

Շարունակելի

Փոխադրութիւնը՝
Վարանդ (Յակոբ) ՔՈՐԹՄՈՍԵԱՆԻ



Դարավոր պայքար

Սկիզբը՝ 2022-ի թիվ 16, 2023-ի թիվ 14

Բռնությամբ ստեղծված սելջուկյան խայտաբղետ տերությունը չէր կարող երկար գոյատևել եւ արդեն ԺԱ դարավերջին քայքայվում եւ տրոհվում է առանձին ամիրայությունների: Այդպիսիք ստեղծվում են նաեւ Հայաստանում՝ Շադդադյանները՝ Շիրակում, Շահարմենները՝ Խլաթում, Արտուխյանները՝ Աղձնիքում, Դանիշմանները՝ Փոքր Հայքում, ինչպէս նաեւ Կարսի, Կարմո ու Երզնկայի ամիրայությունները: Այդ ամիրայություններում եւս հայ բնակչությունը տառապում ու տանջվում էր, ենթարկվում բռնի մահմեդականացման. «Եթէ բնակչությունը եւ գերիները չէին ուզում կամովին ընդունել մուսուլմանական հավատը,— աս-

ված է թուրքական աղբյուրներից մեկում,— Դանիշմենդը իրամայել է սպանել նրանց մի մասին, որպէսզի ազդեն մյուսների վրա»:

Թուրքական դաժան լուծն ստիպում է հայ ժողովրդին ազգային-ազատագրական պայքար սկսել: Այդ ժամանակ բավականաչափ ուժեղանում է վրացական պետությունը, որն ազատագրվում է սելջուկյան տիրապետությունից: Ստեղծվում է հայ-վրացական զինակցություն, որն առաջին հաջողություններն է ունենում Դավիթ Շինարար թագավորի օրոք (1089–1125 թթ.): Նա սելջուկներից ազատագրում է Անդրկովկասի մի շարք շրջաններ, այդ թվում՝ Լոռին, ինչը ոգեշնչում է հայ բնակչությանը: Ազատագրական շարժումը մոր թափ է ստանում հատկապէս Շիրակում:

Անիի ապստամբ հայերը 1123 թ. դիմում են Դավիթ Շինարարին՝ Աբուլսուար ամիրայի եւ առհասարակ սելջուկների դեմ համատեղ պայքարելու խնդրանքով: Նա օգնությամբ է գալիս զորքով: Սամուել Ամեցին այս մասին գրում է. «Անի քաղաքի եւ Շիրակի գավառի տարակույսի մէջ ընկած ու տառապած բնակիչները մտածեցին ելք գտնել փոթորկից, եւ նրանք, ձեռնառն լինելով վրաց Դավիթ թագավորին, նենգեցին.... Աբուլսուարին.... Նրանք, բանալով քաղաքի դռները, թագավորին ներս թողեցին, եւ այդ ժամանակ, երբ սա ներս էր մտնում, եւ ոչ մի մարդ չսպանվեց»:

Դավիթ Շինարարի մահից հետո՝ 1126 թ., Աբուլսուարի որդի Ֆատուլուն, հարեւան ամիրայությունների օգնությամբ մեծ ուժեր հավաքագրելով, հարձակվում է Անիի վրա, որի հայ բնակիչները մարտնչում էին հերոսաբար: Նրանց մէջ էին նաեւ կանայք. աննկարագրելի անձնուրացություն եւ խիզախություն է ցուցաբերում Այծեմնիկը, որն անտեսելով նետերից ստացած վերքերը՝ մարտնչում է մինչեւ վերջ եւ զոհվում քաջաբար: Անհավասար մարտերում Շահդադյանները դարձյալ գրավում են Անին եւ Շիրակը, ինչը խիստ ծանրացնում է հայ ժողովրդի վիճակը:

Հայ-վրացական զինակցությունն անրապնդվում է հատկապէս վրաց Թամար թագուհու (1184–1213 թթ.) օրոք, եւ պայքար է ծավալվում նաեւ Հայաստանի ազատագրման համար: Վրացական պետության կյանքում կարեւոր դերակատարում ունեին Չաքարյանների տոհմից Չաքարե եւ Իվանե եղբայրները, որոնցից առաջինը դարձավ հայ-վրացական զինված ուժերի գլխավոր

իրամանատար (ամիրապասալար), իսկ երկրորդը՝ պալատական մախարար (աթաբեկ): Հայ-վրացական միացյալ զորքերն ազատագրում են Գուգարքը (Լոռին), Արցախն ու Սյունիքը, Արարատյան եւ Շիրակի դաշտերը, Անին, Դվինը, Կարսը, Բագրեւանդը եւ մի շարք այլ տարածքներ: Դեպքերին ականատես Կիրակոս Գանձակեցին Չաքարե եւ Իվանե եղբայրների մասին հիշատակում է. «Սրանք քաջությամբ վարեցին շատ պատերազմներ ու հայերի բազմաթիվ երկրներ, որ պարսիկների ու տաճիկների ձեռքին էին, առան նրանցից եւ սեփականացրին, այն է՝ գավառները, որ գտնվում էին Գեղարքունի ծովի շուրջը, Տաշիրը եւ Այրարատը, Բջնի քաղաքը եւ Դվինը, եւ Ամբերդը, եւ Անին, եւ Կարսը, եւ Վայոց ձորը, եւ Սյունյաց աշխարհն ու այն բերդերը, քաղաքներն ու գավառները, որ գտնվում էին նրա շուրջը: Նրանք հարկատու դարձրին եւ Կարմո քաղաքի սուլթանին.... Նրանք ընդարձակեցին իրենց սահմանները բոլոր կողմերից»:

Ազատագրվում է գրեթէ ողջ Հյուսիսարեւելյան Հայաստանը եւ վրացական թագավորության կազմում ձեռք է բերում որոշակի ինքնուրույնություն. այն կառավարում էին Չաքարյանները: Վերականգնվում են Բագրատունիների ժամանակաշրջանի ֆեոդալական հարաբերությունները, զարգանում են տնտեսությունն ու առեւտուրը, արհեստները, աճում են քաղաքները, ուժեղանում են հարաբերությունները հարեւան երկրների հետ, մասնավորապէս սերտ կապեր են հաստատվում Ռուսաստանի եւ Անդրկովկասի միջեւ: Տնտեսական առաջընթացը զուգորդվում էր մշակութային զարգացման հետ:

Հայացք դարի բարձունքից

Սկիզբը՝ թիվ 11–12

Նյութերին ծանոթացրի մայրիկիս՝ առանձնահատուկ մշտլով նրա կյանքի ամենամեծ առաքելությունը. յոթ որդի եւ մեկ դուստր է նա լույս աշխարհ բերել: Ասլամազյան քույրերն ինչ ցնծությամբ արծագանքեցին այս «վիճակագրությանը», նույնիսկ ծափ զարկեցին... չէ՞ որ նրանց ընտանիքում էլ է թվերի նույն՝ 7:1 հարաբերակցությունը՝ միայն թե գեղեցկուհիների գերակայությամբ...

Ուշագրավ մի ռեկորդի մասին էլ ասացի՝ մայրս քսան տարեկանում արդեն... երեք որդի ուներ...

— Հեղինե՛ մայրիկ, Դուք իսկական հերոսուհի եք, կեցցեք,— պաթոսով ասաց Մարիամ Ասլամազյանը, եւ ինքն ու մայրս ողջագուրվեցին: Մյուսներն էլ արծագանքեցին ջերմ ու յուրովի:

Վաթսուհի շեմին մոտեցող մայրս դեռահաս պարմանուհու պես շիկնեց եւ գովեստներից մեղվելով՝ փութաց վերնահարկ հարսների հետ սեղանը «համովացնելու»:

Մեր երկհարկանի տան կառուցումն իմ արդեն երջանկահիշատակ ուսուցիչ եւ գյուղատնտես հայրը համարյա ավարտին է հասցնում Մեծ հայրենականի նախօրեին եւ... զորակոչվում գործող բանակ: Տան ներքնահարկում դեմ դիմաց, զույգ մառաններն են՝ բարձր կամարով իրար կապված: Յուրերիս առաջարկեցի նախապես փոքրիկ շրջայց կատարել մառաններում, մանավանդ որ այնտեղ կարասներից մեկը «քմարերգուն» է՝ մաճառը համերգուն, անուշ լիրիկա է բուրում՝ վասն խաղողի եւ գինու...

Նախ եղանք ձախակողմյան՝ մրգաբույր մառանում, ուր այն առատ, երանավետ տարիների գյուղական պարզ կենցաղավարության կահ-կարասիք էին՝ փայտյա խմորատաշտը, խնոցին, երկանքը, լավաշի պահարանը, պարենամթերքի (հորած պանիր, խիտ աղաջրի մեջ պահվող Սեւանա կողակ ձուկ...) կճուճներ ու արծնապատ զանազան կավանաններ, ուռնու ճկուն շիվերով գործած կողովներ ու սալաներ՝ սերկեփով ու պահուհի խնծորով լեցուն, մատնաչափ փշատով, արեւաշող ու արեւահամ չիր ու չամիչով լի զամբյուղներ...

Միջանցիկ քամուց սկսեցին ճոճվել օճորքից կախված ձմեռնուկ տանձի «ջահերը», ավան խաղողի կախանները, սուլուխի եւ

ալանու դեռես թաց, սակայն գայթակղիչ շարերը... Մառանի օդն ամբողջությամբ հագեցած էր ախորժաբեր բուրմունքով...

— Բաբկեն եւ Մարիամ, տեսնում եք, չէ՞, նկարելու ինչ հրաշալի օբյեկտ է,— ապագայի միտումով գոհունակ ակնարկեց երանուհի Ասլամազյանը:

Հիմա էլ իջանք մյուս՝ գինու-օղու խորունկ մառանը: Այստեղ կիսամութի մեջ պարզորոշ ուրվագծվեցին կաղնեփայտե տակառներն ու կավե հսկա կարասները՝ շարքով, իսկ երբ մթությունն իսպառ ցրեց նեոնային պայծառ լամպը, հնձանում աստղիկների պես շողարձակեցին խաղողի ոսկեհատիկ ողկույզները: Ցեմենտյա ողորկ պատերով հնձանում գրեթե երկու տոննայի չափի Հայաստանի ամենաբաղոց՝ «Ոսկեհատ» («Խարջի») տեսակի ընտրված խաղող էր ամբարված: Ասացի, որ եղբայրներս այսօր կավարտեն բերքահավաքը, իսկ երեկույան մերկ ոտքերով կճմեմ ողկույզները եւ միլիոնավոր հատիկներից քամված անուշ հյութը՝ շիրան, զուբից դուլ-դուլ կհանեն ու կարասները կլցնեն, որպեսզի օրերի հետ այն խմորվի, մաճառ դառնա, ապա՝ ոսկեվազյան ոսկեշող գինի: Մերկ ոտքերով ողկույզները ճմելու մասին ասածս, պարզվեց, բոլորի մտապատկերում էլ նույն հիշողությունն է արթնացրել: Ակսել Բակունցի «Միրհավ» նրբահյուս պատմվածքը, քարե տաշտը, Դիլան դային, զառ մանդիլով նորահարս Սոնան... Ձարմանալի զուգադիպությամբ հինգ տարի առաջ՝ խաղող ճմելու, գինի արարելու այսպիսի աստվածահաճու պահի, մեր տուն եկավ «ավագ որսկան» Վախթանգ Անանյանը, եւ որ շատ հետաքրքիր է, նա նույնպես հիշեց իր մտերիմ գրչընկեր Ակսելին, ապա Դիլանին, Սոնային եւ դեռ ավելին՝ «այնքան տաք էր հնձանը...»: Այո, ոսկեգրիչ Ակսել Բակունցը չի կարող չհիշվել. այսօր եւ առնչաբար նա մեր կյանքի հավերժող ուղեկիցն է...

Մոտեցանք մեկ շաբաթ առաջ խաղողահյութով մինչեւ բուկը լցված այն կարասին, որը «գժվել» էր, եւ ներսում անզուսպ երգ ու եռք էր, ուղղակի անկասելիորեն փրփրել էր նորահաս գինին: Այդպես է գինու բանը. եռում-փրփրում է խաղողահյութը՝ քաղցուն, ապա մեկ ամիս անց հանդարտվում, դառնում, ինքնազտվում, դառնում է թափանցիկ-ոսկեգույն, սակայն արդեն սարսափելի անուր... ալկոհոլի լիցքով...

Իսկ հիմա գինեբույր կարասը միալար երգում է իմաստուն, եւ նրա այդ դուրեկան երգն ինձ ծանոթ ու հարագատ է դեռ իմ մանուկ օրերից...

Մոտ 600 լիտրանոց կարասը մեր մառանի (եւ ոչ միայն մեր...) ամենամշանավորն է, քանզի... «ծննդյան վկայական» ունի... Ես մատնացույց արեցի կարասի վերնամասի այն շրջանը, որտեղ դեռես հուս, չթրծված կավի վրա, ձեռքի ոսկրե գործիքով, ալիքածել, գեղեցիկ մախշազարդումներ է արել կավագործ վարպետը, ապա փորագրել ծննդյան տարեթիվը՝ 1619 թ., եւ դրել մետրոպատա իր ստորագրությունը՝ Դաւիթ:

Յուրերս ավելի աշխուժացան, այո, ուրեմն ստացվում է, որ ուղիղ 359 տարի առաջ վարպետ Դավիթի թրծած այս կարասում խաղողագործների քանի՜-քանի՜ սերունդ գինի է արարել ու ըմբռնել...

Մեզ լիրիկական գեղումների տրամադրող մառանում, դարձյալ վասն խաղողի ու գինու, մենք, միմյանց լրացնելով, հիշեցինք «գինեվետ» բանաստեղծներ Խայամին, Վահագն Դավթյանին, Հրաչյա Հովհաննիսյանին եւ էլի ուրիշներ:

Ես էլ բարձրաձայնեցի հողաբույր բանաստեղծ Համո Սիպիանին, որը 1952-ին վայելել է Ոսկեվազի արեւահամ գինին ու գրել.

*Ձեր Ոսկեվազի գինին հնուց
Արար-աշխարհ է հիացնում,
Այդ նրանից է, որ խմելուք
Մի ժամ հետո է արթնցնում...*

*Դու ինչքան լավ ես քամում գինի,
Ասա զաղտմիքը, թող իմանամ՝
Ինչպե՞ս անեմ, որ երգս լինի
Ձեր Ոսկեվազի գինու նման:*

Պապիկ-տատիկիս ժամանակներից մեզ անցած շէկիկ, կլորիկ, սիրունիկ մի հնօրյա գավով կարասից նորամանուկ մաճառագինի հանեցի, որպեսզի նույն կարասի 359—360-րդ տարեշրջանը բացեմք իմ հարգետոր հյուրերի հետ՝ համադամ ուտեստների անհրաժեշտ ճաշակմամբ: Դե, մեր մեծերն իրենց փորձից գիտեին, որ գինի դարձող մաճառի «գիժ» ժամանակ անուշորեն խմվող հեղուկին պետք չէ շատ վստահել. ասում էին՝ այն




Մարիամ
եւ երանուհի
Ասլամազյան
քույրերը

կամ խմողի գլուխն է բռնում՝ պտտում, կամ ոտքերն է իջնում՝ թուլացնում... Մի բան էլ ես հյուրերիս նախագուշացրի՝ այսօր կամ մաճառ, կամ խաղող, բայց ոչ երբեք դրանք միաժամանակ... նույն ստամոքսում: Իմ ասածը հաստատեց իր ավելի հարուստ կենսափորձով Բ. Քոլոյանը, ապա հարցրեց. «Ժողովուրդ ջան, ինչ կարծիքի եք, մի-մի թաս հենց էստեղ անուշ չանջնք»: Սակայն «դեմոկրատիկ» սկզբունքով նույն «Ժողովուրդ ջանը» տեղում մերժեց առաջարկը: Այստեղ ես էլ հավելեցի, որ «մառանախում»-ը հիշեցնում է Մաքսիմ Գորկու հետ պատահածը. Հայաստանի թանկագին հյուր գրողին երեւանի կոնյակի, գինու-օղու «Արարատ» տրեստի մառաններում շրջայցի են տանում, համտեսում է հայկական համբավավոր խմիչքները եւ... Հետո նա այդ օրը շատ դիպուկ, թեւավոր դարձած խոսքով է հիշում.

«Երեւի թե ավելի հեշտ լիներ Արարատ լեռան գագաթը բարձրանալ, քան ելնել... «Արարատ»-ի մառաններից...»:

Շարունակելի

Սերժ ՄԱՆՈՒԿՅԱՆ



Սույն ժամանակաշրջանում ձեւավորվում եւ զարթոնք է ապրում նաեւ Կիլիկիայի հայկական պետությունը: Հայերը Կիլիկիայում բնակություն էին հաստատել դեռես հնագույն ժամանակներից, եւ նրանց թիվն աստիճանաբար ստվարացել էր: Արդեն Ե դարում նրանք նկատելի թիվ էին կազմում, եւ ունեին իրենց եկեղեցիներն ու իշխանները: Անգամ Ալեքսանդրեթի (Իսուսի) ծոցը մի ժամանակ կոչվել է Հայոց ծոց: Հայերի հոսքը դեպի Կիլիկիա ուժեղանում է հետագա դարերում՝ արաբա-բյուզանդական պատերազմների, ապա՝ սելջուկ-թուրքերի կործանարար արշավանքների հետեւանքով: Տանջահար հայերը փրկություն էին որոնում նաեւ գաղթելով Կիլիկիա: Խիստ ծանր էր նաեւ բյուզանդական կայսրության հայերին հալածելու եւ ջլատելու քաղաքականությունը, որի հետեւանքով իրենց հայրենի բնակավայրերից դեպի Փոքր Ասիա, Կիլիկիա եւ գաղթում հազարավոր հա-

յեր: Այսպես՝ միայն Վասիլ Բ կայսրը 1021—1022 թթ. Վասպուրականից բռնագաղթեցնում է մոտ 15000 հայ ընտանիքի:

Այս ամենով հանդերձ՝ աշխատասեր ու շինարար հայերը ոչ միայն պահպանում էին ազգային նկարագիրը, այլ նաեւ բնակության նոր վայրերում կարգավորում իրենց կյանքը, զարգացնում տնտեսությունն ու մշակույթը: Ավելին՝ նրանք Կիլիկիայում ստեղծում են իրենց իշխանությունն ու պետությունը (թագավորությունը), որը կապված էր բուն Հայաստանի հետ եւ գոյատևում է մոտ 300 տարի (1080—1375 թթ.): Հաստատվում է ֆեոդալական միապետություն, որն ուներ նավատորմ եւ մասնակցում էր միջազգային առևտրին: Կիլիկյան տերությունը եւս կործանվում է մահմեդական հորդանների՝ մասնավորապես եգիպտական մամլուքների հարվածներից:

Բուն Հայաստանում տնտեսական եւ մշակութային առաջընթացը խաթարվում է

ճոր արհավիրքով՝ մոնղոլական արշավանքներով եւ տիրապետությամբ (1236—1344 թթ.), որոնց հետեւանքով ավերվում է երկիրը, կործանվում են ծաղկող քաղաքները, անկում են ապրում տնտեսությունն ու մշակույթը: Մոնղոլական դաժան լծի դեմ կազմակերպվում են հայ-վրացական միացյալ ապստամբություններ, որոնք, սակայն, ավարտվում են պարտությամբ:

Այնուհետեւ գլուխ է բարձրացնում միջինասիական բռնապետ Լենկ Թեմուրը (Թամուշան), որը սերում էր թուրքացած բաղաս մոնղոլական ցեղից: Նա 1386—1394 թթ. մի քանի անգամ արշավում է Հայաստան, քարուքանդ անում երկիրը, այրում եւ կողոպտում քաղաքներն ու գյուղերը, սարսափելի դաժանությամբ կոտորում բնակչությանը: Լենկ Թեմուրի հրոսակային զորքերը երեւանում զազանաբար հոշոտում են 500 տղամարդու, Վանում 7000 հոգու տանջամահ են անում՝ մեծ մասին գլորելով քաղաքի բերդի ժայռապատ պարիսպներից, Սեբաստիայում կենդանի թաղում են 3000 հայի. այս մասին ժամանակակիցը վկայել է. «Սույն տարում (1400 թ.) Թամուր բեկը գրավեց Սեբաստ (Սեբաստիա) քաղաքը, որը քանդեց ու ավերեց, սրախողխող արեց բոլորին, գերեվարեց շատ կանանց ու երեխաների եւ 3000 մարդու, որոնք նետ էին արձակել իր վրա, փոս փորելով կենդանի թաղեց»:

Լենկ Թեմուրը 1402 թ. Անգորայի ճակատամարտում պարտության է մատնում թուրք սուլթան Բայազիդ Ա-ին եւ գերի վերցնում նրան: Պատմում են, որ նա, տեսնելով գերեվարված սուլթանին, ծիծաղում է, ինչից նեղսրտած Բայազիդն ասում է. «Սպանի՛ր ինձ, բայց մի՛ ծաղրիր»: Լենկ Թեմուրը

պատասխանում է. «Քեզ չեմ ծաղրում. տես՝ ինչ մեծ ու գեղեցիկ է այս աշխարհը, մի՞թե բոլորը համաձայն են, որ այն պատկանի այնպիսի կաղին, ինչպիսին ես եմ, կամ այնպիսի կույրին, ինչպիսին դու ես» (Թեմուրը կաղ էր, այստեղից էլ Լենկ (Կաղ) Թեմուր, իսկ Բայազիդը՝ կույր, ուստի եւ՝ Քոռ Բայազիդ անվանումները):

Լենկ Թեմուրի աշխարհակալությունն ավարտվում է նրա մահով՝ 1305 թ., որից հետո նրա վիթխարի բռնատիրությունը կազմալուծվում է: Այս իրավիճակից օգտվում են թուրքմենական քոչվոր ցեղերը, որոնցից Հայաստանում տիրապետող են դառնում սկզբում կարա-կոյունլու (1411—1467 թթ.), իսկ հետո՝ ալ-կոյունլու (աղ-կոյունլու) ցեղերը (1467—1512 թթ.): Այդպես էին կոչվում, քանի որ նրանց դրոշմերի վրա պատկերված էին սեւ ու սպիտակ ոչխարներ, խոյեր (կարա՝ սեւ, ալ (աղ)՝ սպիտակ): Սրանք մշտական հակամարտությունների մեջ էին եւ մղում էին պատերազմներ միմյանց դեմ՝ նաեւ Հայաստանում գերիշխող դառնալու համար, որից ամենաշատը տուժում էր հայ ժողովուրդը: Հայ բնակչությունն անգթորեն հարստահարվում եւ կեղեքվում էր, զնդակոծվում ու ոչնչացվում:

Այսպես մեկը մյուսի հետեւից Հայաստանում տիրապետող էին դառնում մահմեդական վայրի ցեղերը եւ ավերում երկիրը, կոտորում հայ ժողովուրդին: Հետագայում առավել սարսափելի պետք է լինեին մոլեռանդ օսմանյան թուրքերը, որոնց ճանապարհը վերածվեց համատարած գերեզմանոցի...

ԱՆՈՒՆ ԱՐԱՍԱՐՅԱՆ

Հայ եկեղեցին եւ արեւելահայ դպրոցը ԺԹ դարի երկրորդ կեսին


Սկզբը՝ 2022-ի թիվ 23, 2023-ի թիվ 2—3, 13—14

Քեմական դպրոցում առաջադիմական գաղափարները վառ պահելու համար հետեւողական գործունեություն է ծավալում Ղազարոս Աղայանը. վերջինիս համբավն ու հեղինակությունն առանձնակի ոգեւորություն են առաջացնում երիտասարդության շրջանում: 1880 թ. մեծ ճանաչում ունեցող Արիստակես վարդապետը վերադառնում է Ս. Էջմիածին: Վերջինիս հեռանալը Շուշիից հիասթափեցնում է խանդավառված երիտասարդությանը, եւ դպրոցի հետագա զարգացումը հետզհետեւ նահանջում է: 1882 թվականի ամռանը դպրոցից հեռանում է նաեւ Ղ. Աղայանը, իսկ Ս. Մանդինյանը դեռեւս 1881 թ. նշանակվել էր Գեւորգյան հոգեւոր ծննդարանի տեսուչ: Այս ամենի արդյունքում Շուշիի թեմական դպրոցի պատմության մեջ սկսվում է նահանջի եւ անկման տասնամյա շրջան:

Այսպիսով՝ թեմական դպրոցները, չնայած որոշակի սահմանափակումներին եւ դժվարություններին, իրենց ձեռքում էին կենտրոնացրել ժամանակի բարձրագույն կրթության գլխավոր դերակատարությունը:

Գ. Հոգեւոր կամ վիճակային դպրոցներ

Հայկական կրթական համակարգում ուրույն տեղ են ունեցել հոգեւոր կամ վիճակային դպրոցները: Ակնհայտ է, որ «Պոլոժենիեն» այս կարգի դպրոցների վերաբերյալ սահմանում են որոշակի կանոններ, ինչը թույլ է տալիս եզրակացնել, որ ժԹ դարի երկրորդ կեսին նմանօրինակ դպրոցներին եւս մեծ նշանակություն էր տրվում: Հոգեւոր կամ վիճակային եւ ծխական դպրոցների միջեւ զգալի տարբերություն չէր նկատվում. վիճակային կրթօջախները կարծես ծխական դպրոցների շարունակությունն էին (տես Վ. Երկանյան, Պաքար հայկական մոր դպրոցի համար Անդրկովկասում, Երեւան, 1970, էջ 46): Վիճակային դպրոցները հիմնադրվում են 1830-ական թվականներից սկսյալ, երբ հայկական կրթական համակարգը, Ամենայն Հայոց Կաթողիկոսի ջանքերի շնորհիվ, օգտվում էր որոշակի ինքնուրույնությունից: Շամախիի թեմական հոգեւոր, Ագուլիսի (Վերին) հոգեւոր միջնակարգ եւ Երնջակի Ս. Կարապետ վանքի (Ապրակունիս գյուղի) հոգեւոր ծխական դպրոցների պատմությունն ուսումնասիրելիս պարզում ենք, որ այս դպրոցները հիմնադրվել են ժԹ դարի 30-ականներից հետո՝ 1844 (1843 թ.), 1849, 1860 թվականներին (տես Ս. Խուդոյան, Արեւելահայ դպրոցները 1830—1920 թվականներին, Երեւան, 1987, էջ 196, 204, 457): Իսկ Շ. Հարությունյանը գրում է, որ կայսրության հայաշատ տարբեր քաղաքներում ժԹ դարի 30-ական թվականներից սկսյալ բացվել են փոփոխական հաջողությամբ գործել են նաեւ հայկական հոգեւոր կամ վիճակային դպրոցներ (Ալեքսանդրապոլ, Ղզլար, Մոզդուկ, Բաքու, Եկատերինոդար եւ այլն. տես Շ. Հարու-



թյունյան, Հայ ժողովրդի պատմության համառոտ ժամանակագրություն 1801—1917, Երեւան, 1955, էջ 73): 1836 թ. «Պոլոժենիեն» հաստատում էր հոգեւոր դպրոցների գոյությունը, իսկ Հայ-լուսավորչական հոգեւոր դպրոցական հաստատությունների կանոնադրության բաժնում ասվում էր. «Հայ պատանիների աստուածաբանական գիտութիւնների մէջ կրթելու համար Էջմիածնի վանքում հոգեւոր ծննդարան եւ ամեն թեմում մի հոգեւոր դպրանոց (սեմինարիա)» (Ներսէս վրդ. Մելիք-Թանգեան, Հայոց եկեղեցական իրաւունքը, Ս. Էջմիածին, 2011, էջ 558):

Ինչպէս տեսնում ենք, 1836 թ. «Պոլոժենիեն» առանձին կանոններով սահմանել էր Հայ-լուսավորչական եկեղեցու հոգեւոր դպրոցների իրավունքները: Հոգեւոր կամ վիճակային դպրոցներում ուսման ողջ ընթացքը 6—8 տարի էր: ԺԹ դարի երկրորդ կեսին հայկական կրթական համակարգի զարգացման գործում առանձնակի տեղ ուներ Ալեքսանդրապոլը, որը, այլ զավառների համեմատությամբ, կարճ ժամանակահատվածում կազմակերպել էր իր հասարակական-քաղաքական կյանքը: Ալեքսանդրապոլում գործող հայտնի կրթօջախներից էր Ս. Փրկիչ եկեղեցու վիճակային դպրոցը: Ա. Ղլոժյանը պատճառաբանելով, որ «տեղական փոխանորդական եւ հոգեւոր կառավարութեան գործերն այրուած են», չի հայտնում, թե որ թվականից է այս դպրոցը դարձել հոգեւոր կամ վիճակային: Ս. Սանթրոսյանի ուսումնասիրությունները, սակայն, հանգեցնում են այն համոզմանը, որ «լիապէս եկեղեցական իշխանութիւնների տնօրինութեան տակ գտնուող ու եկեղեցական միջոցներով պահուող «հոգեւոր» դպրոց ստեղծւում է 1852—1853 թթ.» (Ա. Ղլոժեան, Պատմութիւն Ալեքսանդրապոլի հայոց հոգեւոր վիճակային դպրոցի (1840—1912), Ալեքսանդրապոլ, 1912, էջ 16): Ա. Ղլոժյանը վիճակային դպրոցի պատմությունը բաժանում է մի քանի շրջանի: Ենթադրում ենք, որ հոգեւոր դպրոցի ուսուցիչները մեծավ մասամբ պետք է հոգեւորականներ լինեին: Սակայն հոգեւորականներից բացի՝ վիճակային դպրոցում դասավանդում էին ժամանակի ուսյալ աշխարհիկները, որոնցից մեծ հարգանք էր վայելում Մկրտիչ Արաքաջյանը, որի գործունեության շրջանում դպրոցում զգալի առաջընթաց էր նկատվում:

Այս վիճակային դպրոցը գոյության ընթացքում չի օգտվում Ս. Աստվածածին եկեղեցու հանգանակած միջոցներից: Ըստ այսմ՝ ենթադրում ենք, որ այն ունեցել է սկզբնական աղբյուրներ՝ քաղաքացիների նյութական օգնություն ու տարաբնույթ նվիրատվություններ: 1868 թ. սկսվում է դպրոցի ծաղկման շրջանը. «....փոխում է դասարանական հիմ սիստեմը, աշակերտները բաժանում են ըստ գիտութեան եւ հասակի, եւ ամեն դասարան ստանում է մի ամբողջական պատկեր.... դուրս է ձգւում հիմ ժամանակուայ գիտութեան գլուխ գործոցը՝ ճարտասանութիւնը» (Ա. Ղլոժեան, նշվ. աշխ., էջ 43): Ծաղկման շրջանում ներմուծվում է աշակերտներից ուսման վճար գանձելու կարգը, սակայն պահպանված տեղեկությունների համաձայն՝ սաների 1/5-ը կրթության վարձ չի վճարել: Այս պայմաններում դպրոցը շարունակում էր իր «առաքելությունը» եւ 1881—1882 ուսումնական տարում ուներ 14 բաժին՝ նախատեսված 564 աշակերտի համար: Իսկ 1884—1885 ուսումնական տարում դպրոցն ուներ մոտ 850 աշակերտ: Սա մեծ թիվ էր. Ալեքսանդրապոլի դպրոցի պատմության ողջ ընթացքում աշակերտների թիվն այսքան չէր եղել: Սակայն ցարական Ռուսաստանի՝ հայկական կրթական համակարգին հարվածող քաղաքականության արդյունքում 1885 թ. մի շարք դպրոցների հետ փակվում է նաեւ այս դպրոցը: Իսկ 1886 թ. վերաբացվում է որպէս ծխական դպրոց՝ երկրային համակարգով. այն արդեն 1888 թ. ուներ երեք պատրաստական խումբ եւ երկու դասարան, որոնցում սովորում էր 367 աշակերտ: 1894—1895 ուսումնական տարում աշակերտների թիվը 387 էր, որը զգալիորեն չէր տարբերվում աշակերտների՝ 1888-ի թվաքանակից: Որպէս ծխական երկրային դպրոց՝ այն գոյություն է ունեցել մինչեւ 1896 թ. (տես Ս. Խուդոյան, նշվ. աշխ., էջ 18):

Կրթական համակարգն առաջընթաց գրանցեց նաեւ Վրացահմերթական մահանգում: Արեւմտահայերի ներգաղթից հետո տնտեսական վիճակը հետզհետեւ կայունանում էր, ինչի հետ միաժամանակ աշխուժացում էր նկատվում նաեւ կրթաշակութային կյանքում: ԺԹ դարավերջին գործունեություն ծավալեցին Դերենիկ Դեմիրճյանը, Վարդան Շահպարտյանը, ազգագրագետ Երվանդ Լալայանը, հրապարակախոս Պողոս Աբելյանը եւ այլք: Մշակութային առաջընթացը բարերար ազդեցություն ունեցավ առաջին հերթին դպրոցական կյանքի համակարգման եւ հետագա զարգացման վրա: Արացահմերթական մահանգում գործող հոգեւոր դպրոցների շարքում աչքի էր զարնում Ախալցխայի Կարապետյան դպրոցը (արա-

կան միջնակարգ): Ըստ Ս. Սանթրոսյանի՝ դպրոցը հիմնադրվել է 1830 թվականին, իսկ այլ փաստաթղթերում նշված են նաեւ 1838 եւ 1848 թվականները: Ա. Մելքոնյանն Ախալցխայի եւ Ախալքալաքի դպրոցների պատմությունը շարադրելիս գրում է. «1830-ական թթ. սկզբներին Կարապետ արքեպիսկոպոսի նախաձեռնությամբ բացվեցին ծխական դպրոցներ, Ախալքալաքում՝ Կարապետյան (1830 թ.), Ախալքալաքում՝ Մեսրոպյան (1836 թ.) արական վարժարանները» (Ա. Մելքոնյան, Նյութեր Ախալցխայի եւ Ախալքալաքի դպրոցների պատմությունից, Երեւան, 2005, էջ 61): Դպրոցը 1873 թ. ունեցել է շուրջ 150 աշակերտ եւ 7 ուսուցիչ: Ա. Մելքոնյանը նշում է նաեւ, որ ուսուցիչները եկել էին Երզրումից. նրանցից ոմանք մանկավարժական փորձ էին ձեռք բերել Երզրումի մախկին Կարապետյան վարժարանում: Կարապետյան դպրոցը հայկական դպրոցների համատարած փակումից առաջ (1885 թ.)՝ 1884 թվականին, ունեցել է երեքասարանյան կազմ եւ հավասարվել է ժամանակի միջնակարգ դպրոցներին: Ս. Խուդոյանը նշում է, որ դպրոցը վերաբացվել է 1886 թ. եւ ունեցել է երկդասարանյան համակարգ: Դպրոցում ավանդվել են հայոց եւ ռուսաց լեզուներ, կրոնագիտություն, գեղագրություն, երգեցողություն եւ ծայնագրություն (Ս. Խուդոյան, նշվ. աշխ., էջ 504): Ս. Խուդոյանն ու Ա. Մելքոնյանն այս առարկաների դասաժամերի քանակի վերաբերյալ մեզ տեղեկություններ չեն փոխանցում:

Գոյությունը հազիվ պահող դպրոցի առջեւ ծառացած խնդիրները լուծվում էին եկեղեցական դրամական սուղ միջոցների հաշվին: Վ. Երկանյանը գրում է, որ ժԹ դարի 60-ական թվականների վերջերին դպրոցում ուսանող աշակերտների թիվը տատանվում էր 100—400 միջեւ, ըստ այսմ՝ ենթադրում ենք, որ դպրոցական կյանքը բարելավվել էր: Հաճախ եկեղեցական դրամական միջոցները, որոնք հատկացվում էին դպրոցին, վատնվում եւ իրենց նպատակին չէին ծառայում. այս առնչությամբ հատկանշական են Ախալցխայի բնակչության՝ Գեւորգ Դ Կոստանդնուպոլսեցի հայրապետին (1866—1882 թթ.) ուղղած նամակ-խնդրագրի հետեւյալ տողերը. «Քանզի, Վեհափառ Տէր, յանպայման եւ ի տարապարտ իմն չափու ծախքն դրամքն այնոքիկ, որոց գումարն հասանէ առ այժմ աւելի քան զ11.500 ռուպլի, իսկ արդիւնք իրացն համեմատաբար այնքան մեծագումար ծախուց ոչինչ են եւ ոչինչ երելին» (Ա. Մելքոնյան, նշվ. աշխ., էջ 117):

Այսպիսով՝ վիճակային դպրոցներն առանձնակի դեր ունեին ուսումնական կյանքը կազմակերպելու գործում: Այս դպրոցները նպաստում էին հոգեւոր կրթության զարգացմանը, ինչը սույն ժամանակահատվածում ուղղակի եւ անուղղակի իմաստով անհրաժեշտություն էր:

Շարունակելի

Չաքարա սրկ. ԹԱԴԵՎՈՍԱՆ
ԱՆՏԻՈՆ ՊԵՏՐՈՍԱՆ

Բաբելոնյան աշտարակը

Բաբելոնյան աշտարակի հնագույն պատկերը, ավելի ճիշտ՝ աստվածաշնչյան կառույցի իրական մախթաբակը հայտնաբերվել է Նոր-բաբելոնյան թագավորության այրմաբեկորներից մեկի վրա. այն երկար ժամանակ պահվել է մասնավոր հավաքածուում:

Գիտնականների՝ տարբեր ազգերի ներկայացուցիչներից կազմված խումբը հնագույն սեպագիր բնագրերի մեծ մասի թարգմանությունը կատարել է մորվեգացի գործարար Մարտին Շոյենի եզակի հավաքածուից (Schøyen Collection): Այդ հավաքածուն ներառում է տասնյակ հազարավոր ձեռագրեր, որոնք ընդգրկում են մի վիթխարի ժամանակահատված՝

առավել քան հինգ հազար տարի: Հավաքածուում ընդգրկված են Մեռյալ ծովի որոշ ձեռագրեր, բուդդայական հնագույն փաստաթղթեր եւ վավերագրեր, որոնք մեզ են հասել Ավստրալիայի բնիկներից: Մեծ թվով սեպագիր արձանագրություններ եւ քարե սալիկներ են հասել նաեւ Հին Միջագետքից:

Հնագետների եւ լեզվաբանների վերոհիշյալ խմբի կատարած նորագույն հետազոտության արդյունքներն ամփոփվել են 6 «Թագավորական սեպագիր արձանագրություններ եւ դրանց առնչվող բնագրեր Շոյենի հավաքածուում» (Cuneiform Royal inscriptions and related texts in the Schøyen collection) գրքում: ➔ էջ 8



ԴԻՄԻՏՐԻ ԼԻՍԱԶՈՎ ՆԱՄԱԿՆԵՐ ԲԱՐՈՒ ՄԱՍԻՆ



Սկզբը՝ 2022-ի թիվ 19 — 2023-ի թիվ 10

Նամակ երեսունվեցերորդ ԱՅԼ ԵՐԿՐՆԵՐԻ ԲՆՈՒԹՅՈՒՆԸ [Բ մաս]

Բուլղարիայում բնության եւ մարդու փոխհարաբերությունների բնույթում առկա է մեկ զարմանալի գիծ՝ փոխադարձության, փոխադարձ բաց լինելու հատկանիշը: Այս հատկանիշը դեռեւս թույլ է արտահայտված Բուլղարիայի առաջին մայրաքաղաք Պլիսկայում: Պլիսկա քաղաքի անվան հիմքում ընկած է նույն արմատը, որը Ռուսաստանի հնագույն քաղաքներից մեկի՝ Պսկովի անվան հիմքում է (հնում այդ «Պլեսկովը» Պլիսկայի անվանական «եղբայրն էր»): Երկու քաղաքներն էլ տեղակայված են հարթ, տափակ տեղանքում, որից եւ ստացել են իրենց անունները: Պլիսկայի հոյակապ ապարանքի, դրա պատերի, Պլիսկայի ճանապարհների ու սալարկուղու մնացորդներում ընկած են մեծ քարասալեր: Իրենց վիթխարակերտությամբ, ծանրությամբ այդ քարե սալերն ասես հաստատուն են շրջակա տարածքի հզոր հորիզոնագծերը:

Քոչվոր մախաբուղարները, քոչվորական ապրելակերպից անցնելով մատակցի, դեռեւս չէին կարող բաժանվել հարթ տափաստաններից, որտեղ հարմար էր արածեցնել ձիերն ու անասունները, այդ պատճառով իրենց առաջին մայրաքաղաքը հիմնեցին ոչ թե հեշտ պաշտպանող լեռներում, այլ արոտավայրերում: Որպեսզի ամրապնդեն իրենց նոր մատակցա ապրելակերպը, նրանք իրենց առաջին քաղաքը կառուցեցին կարծր քարի հսկայական սալերից՝ դրանով իսկ հավիտյան հավիտենից ընդգծելով իրենց անհրաժեշտ անշարժությունը, իրենց նոր կապվածությունը հողին: Բուլղարիայի երկրորդ մայրաքաղաքը՝



Պրեսլավը, տեղակայված է այլ կերպ՝ շրջապատող լեռների հսկայական գավաթի մեջ: Գավաթաձև հովտի կենտրոնում հռչակավոր Կլոր եկեղեցին է: Շրջապատող լեռները զմայլվում են Պրեսլավով, նրա կենտրոնով՝ Կլոր եկեղեցիով, իսկ Պրեսլավը զմայլվում է իրեն շրջապատող անտառապատ լեռների հզոր պարսպով:

Բնության եւ մարդու այս փոխադարձությունն էլ ավելի յուրահատուկ եւ ուժեղ է Բուլղարիայի երրորդ մայրաքաղաքում՝ Վելիկո Տիմոֆոյում: Վելիկո Տիմոֆոն՝ իր հիմնական շրջաններով, ընկած է բարձր բլուրների վրա, որոնցից երկու ամենակարեւորներն են Ցարեւեցը՝ անառիկ ամրոցով, եւ Տրապեզիցան՝ բազմաթիվ եկեղեցիներով ու վանքերով: Իսկ բլուրների միջեւ բարդ գալարներով հոսում է Յանտրա գետը՝ իր ջրերում արտացոլելով քաղաքի դողդոջող գեղեցկությունը: Լեռների, քաղաքի եւ գետի այդ ողջ բարդ փոխհարաբերությունների վրա խոյանում են էլ ավելի բարձր լեռներ: Դրանցից մեկը տիմոֆյան անվանել են Մոմինայի՝ Աղջկա ամրոց. ամրոց, որը կարող էին պաշտպանել եւ աղջիկները, այնքան ինքնին անառիկ էր այն: Լեռը կարծես քաղաքն է, քաղաքը կարծես լեռներն են... Լեռներն ու քաղաքներն անզանազանելիության աստիճանի միաձուլված են, կարծես ապրում են միասին:



Բուլղարիայի նույնիսկ համեմատաբար նոր՝ «վերածնունդային» քաղաքներն այդպիսին են: Դրանցից մեկը Կոպրիվշտիցան է:

Կոպրիվշտիցան «առաջին թնդանոթի» քաղաքն է: Այստեղ է սկսվել օսմանյան դարավոր լծի դեմ ազատագրական ապստամբությունը: Այս ապստամբության աջակցել է հենց ինքը բնությունը՝ Կոպրիվշտիցան շրջապատող լեռներով ու մթին անտառներով: Եվ տեսե՛ք՝ ինչպիսի միության մեջ են այստեղ ապրում քաղաքը, անտառը եւ լեռները մինչեւ այժմ: Քաղաքի կենտրոնում՝ երկհարկանի տիպիկ բուլղարական տների միջեւ, ապրում են մուգ, հզոր, անսովոր բարձրահասակ անտառային եղեւնիներ: Այս անտառը մուտք է գործել քաղաք: Իսկ յուրաքանչյուր տնից տեսանելի են լեռնային մարգագետինները՝ ոչխարների հոտերով հանդերձ. տեսանելի է քաղաքը շրջապատող տեղանքը՝ հենց ամեն մի տնից (հիարկե հին, որովհետեւ ժամանակակից ճարտարապետները դա չեն հասկանում): Բանն այն է, որ բուլղարացիները հորինել են զարմանալի տներ: Հարկերն այդ տներում միմյանց նկատմամբ տեղակայված են ազատ, եւ երկրորդ՝ բնակելի հարկը միշտ այնպես է շրջված, որ նրա պատուհաններից բացվի փողոցի հեռապատկերը, եւ լինի քաղաքը շրջապատող բնության տեսարան. լեռնային վայրերում՝ դեպի լեռները, ծովափնայում՝ դեպի ծովը: Գեղարվեստական բարձր իմաստով տների, ցանկապատների եւ դարպասների վրա կրկնվում է սահուն գիծը՝ «զամբիկը» (անկտի), ասես բուլղարական լեռների ուրվագծերն ընդօրինակող:


Հավանաբար այն պատճառով, որ ժժ դարի բուլղարացի ամենամշանավոր ճարտարապետ Կոլյո Ֆիչետոն (1800—1881 թթ.) որեւէ տեղ չի ուսանել, նա այնքան յուրովի եւ այնքան ժողովրդական՝ բուլղարական ձեւով է ընկալել ճարտարապետությունը: Նրա համար ճարտարապետությունը բնության եւ մարդկանց կենցաղի շարունակությունն էր: Նրա կամուրջների կամարները ջրի մեջ իրենց արտացոլման հետ մեկտեղ ոչ միայն պատկերում են կատարյալ ձվածիրներ, ձվածեւություններ, շրջաններ, այլ նաեւ զարմանալի սահունությամբ անցնում են կամրջի հեմարանների կամարների մեջ, իսկ դրա այլ շինությունների սյուները ոչ այնքան իրենց վրա են «կրում» կամարները, որքան պարզ եւ բարյացակամ «պատկերում» են դրանք:

Որքան խաղաղություն, լռություն եւ հանգստություն կան աշխարհի ցանկացած ճարտարապետության մեջ ընդհանրապես, ժողովրդական ճարտարապետության մեջ որքան քիչ՝ այժմ նորաձեւ դարձած «կոպտապաշտություն» եւ քաղաքային հարձակվողականություն կան:

Անդրադառնալով մեր հարազատ Անդրկովկասի բնությանը:

Վրաստանում մարդը պաշտպանություն է փնտրում հզոր լեռների մոտ, երբեմն ձգվում է դեպ դրանք (Սվանթիի աշտարակներում), երբեմն՝ դիմակայում լեռնային ուղղաձուգության իր կացարանի հորիզոնականությամբ: Բայց ամենակարեւորն այն է, որ Վրաստանում բնությունն այնքան վիթխարի է, որ այլեւս մարդու հետ պարզ միության մեջ չէ. այն հզորապես հովանավորում է նրան, գրկում, դուրսագնական ոգի փչում նրա մեջ:

Վրաստանի մասին շատերն են գրել: Չեն թվարկի ժժ դարի ռուս մեծ բանաստեղծներին եւ խորհրդային բանաստեղծներին, որոնք գրել են Վրաստանի, նրա բնության ու մարդկանց, սովորույթների ու պատմության, մշակույթի ու արվեստի մասին: Վրաստանը սիրել եւ սիրում են: Վրաստանում բնության եւ մարդու հարաբերությունները ներկայացնելու համար բերում են Ն. Ջաբոթցկու (1903—1958 թթ.) մի բանաստեղծությունը: Թող ընթերցողը չզանգատվի ինձնից, որ այս բանաստեղծությունն ամբողջությամբ են մեջբերում: Բանաստեղծություն կտրելը նույնն է, ինչ նկար կտրելը, իսկ Ն. Ջաբոթցկու բանաստեղծությունները վերընթերցելը միշտ էլ մեծ հաճույք է:



Գիշերը Փասանաուրիում

Գիշերը փայլում էր, փանդուռ նվազում, Լուսինն իր սիրո ապաստանը լողում, Եվ կրկին Փասանաուրիի այգիներում Արագվիների ափին տխական էր երգում:

Խաչի լեռնանցքից իջնելով ես ցած, Ուր դեռ մայիսին սառույց է ու ձյուն, Չափազանց հոգնած՝ չուզեցի ոչինչ՝ Ո՛չ երգ, ո՛չ տխակ, ո՛չ գեղեցկություն:

Եվ տխականի դայլայլի ներքո Առա լապտերը, լրիվ մերկացա, Եվ գետն ինչպես մի խենթ կույս Պինդ գրկեց մարմինն իմ հսկա:

Ես պառկել էի՝ քարերից կառած, Վրաս շողալով հոսանքն էր ոռնում, Քարերը՝ շարժվում ասես մոլեգնած Փնթփնթալով՝ ոտքերիս մոտ պարում:

Նայում էի ես հեռվում մարմրող, Հանգչող կրակի դալկացող լուսին, Եվ հովվաշունը մեծ՝ ափից եկող Վսեն քայլքով մոտենում էր գետին:

Ես ափ դուրս ելա ասես մի մարտիկ, Սառը, անհողողող, մաքուր, երկրային, Եվ շունը վսեն՝ հանգիստ ինչպես դից, Ծանաչելով ինձ փռվեց առջեւ իմ:

Եվ այդ գիշեր այգիներում Փասանաուրիի ճաշակելով սառնությունը կուսական ջրի՝ Սիրտս առա առաջին հնչյունները փանդուռի, Ինչպես համբույրն անդրանիկ՝ պարման օրերի:

Վրաստանում բնությունն իսկապես հզորապես է ընդունում մարդուն եւ դարձնում նրան ուժեղ, վեհ ու ասպետական:

Հայաստանի բնությունից ստացած տպավորություններն ինձ ստիպում են փոքր-ինչ մանրամասն խոսել նրա բնատեսարանների մասին: Հայաստանի դարավոր մշակույթը հաղթել է նույնիսկ լեռներին: «Դարերի շուրջապար,— գրում է Անդրեյ Բելին (1880—1934 թթ.) «Քամին Կովկասից» գրքում,— հնությունները գողված են հողին. եւ բնական քարերը մաշել են քանդակները. եւ արձանները՝ ճաքած, հողի մեջ մխրձված, բարձրացնում են թփերը. չես հասկանում, թե ինչ ես տեսնում. բնություն է, թե՛ մշակույթ: Հեռվում Սեանը բաժանող մերկ-վարդագույն, դեղնաճերմակավուն եւ ակնակուռ լեռնաշղթան է միջանցիկ երանգավորմամբ վեր հառնում Գեղարքունիքի վրա. հողն այնտեղ տաճարներով է դուրս մղված, տաճարներն ամբողջական ժայռաբեկորներ են»:

Չեն կարող զսպել ինձ, որ չմեջբերեմ մի հատված այդ նույն գրքից, որտեղ Բելին նկարագրում է Հայաստանի մասին իր առաջին տպավորությունները՝ ստացած վաղ առաւիտյան գնացքի պատուհանից. ➡ էջ 8

ԴԻՄԻՏՐԻ ԼԻՍԱՅՈՎ ՆԱՄԱԿՆԵՐ ԲԱՐՈՒ ՄԱՍԻՆ

էջ 7

«Հայաստան»:

Կատարները պատահաբար են աղջամուղը: Տարածությունը կազմված է կիրճերի մռայլ-կապույտ, գորշագույն, բաց փիրուզե երանգներից՝ մեմավոր մի աստղիկ աղոտ լույսի տակ: Նոսրացող մշուշի մեջ կանաչ կա: Բայց քերծոտված գագաթն ահա դանակի նման իր կեռ սայրով չխկացրեց երկնականարը, եւ սանրի նման կտրված՝ վեր մագլցեց հողը՝ ստորոտում կապույտ, վայրիորեն հոշոտված: Ասես քարահործանություններից ելնող դանակներ լինեն, որ հարվածում են երկնքի ուղիղ կենտրոնին: Կախված ժայռերի ահավոր ցրվածքի վրա բացված քերծոտված աշխարհ, որտեղ չկա մի գիծ, որ բռնված չլինի մոլեգնությանը» (թարգմ.՝ Ռ. Ավագյանի):


Որ դա Բելիի վաղանցիկ տպավորությունը չէր, ցույց է տալիս այն փաստը, որ դրան արձագանքել է հենց ինքը՝ հայ գեղանկարչության համաճարը՝ Մարտիրոս Սարյանը, եւ ինչը կարող է լինել առավել հեղինակավոր, քան նկարչի նման արձագանքը: Սարյանը՝ «Հայաստան» ակնարկից ոգեշնչված, Բելիին ուղղված իր նամակում գրում է, որ ինքը պահում է այն օրերի հիշողությունները, երբ իրենք միասին «շրջագայում կան անցողւոր՝ էին անում այդ խանձված ու մերկ լեռնային երկրում՝ հիանալով դիզված կապտամանուշակագույն քարերով՝ վեր խոյացած Արարատի եւ Արագածի բարձրաբերձ գագաթների տեսքով»:

Ես չեմ համարձակվում ուղղել Սարյանին, սակայն, այնուամենայնիվ, երբեմն ինձ թվում է, որ Արեւելյան Հայաստանի բնապատկերն ավելի խիստ է, քան Սարյանի կտավներում է այն պատկերված: Անանտառ լեռներ՝ ակոսված անձրեւներից, առուներից եւ խաղողի այգիների զուլերից, լեռներ, որոնցից քարեր էին ցած գլորվում, թանձր խիտ գույներ. սա բնությունն է՝ ասես ժողովրդի արյունը ներծալված:



Ծած: Վերելում գրել են, որ գյուղացու ձեռքով մարդկայնացված ռուսական բնության համար բնորոշ է հերկած հողի, ցանկապատների ու գերանակապ պատերի կշռույթը: Կշռույթը բնորոշ է նաեւ Հայաստանի բնապատկերներին, սակայն Հայաստանում այն այլ է: Մեծ տպավորություն է թողնում Սարյանի «Հողը» (1969 թ.) կտավը: Այն ամբողջ-

վին բաղկացած է զուլերից, սակայն վառ, ալիքաձեւ զուլերից. բոլորովին այլ, քան Ռուսաստանում մարդու ստեղծած կշռույթը:



Հայաստանի աշխատանքային կշռույթները զարմանալիորեն բազմազան են, ինչպես որ բազմազան է նրա ժողովրդի աշխատանքը: Սարյանի «Կեսօրվա լռություն» (1924 թ.) կտավում գետնին կարծես դրված են մշակված դաշտերի քառակուսիներ, ասես չորանալու համար բազմերանգ գորգեր փռված լինեն: Լեռների ու դաշտերի կշռույթները ներդաշնակում են հակադրվում են միմյանց:

Կոչոյանի «Արարատյան դաշտավայրը» (1957 թ.) կտավում կշռույթն ազատ է ու թեթեւ: Նրանում լեռներն ալիքներ են, դաշտավայրի զուլերը՝ թեթեւ ծովային ծփանք միայն:

Հայաստանի բնության հարստության մասին է վկայում նաեւ այն, որ գեղանկարչության մեջ այն զարմանալիորեն բազմազան ձեւերով է արտացոլված: Միեւնույն իսկ նկարիչը տարբեր ձեւերով է տեսնում այն: Եվ դրանով հանդերձ՝ մենք միշտ կասենք՝ դա Հայաստանն է:

Երկիր մուշկագույն հողեհների ու

Մեռյալ դաշտերի կավագործական...

(«Հայաստան», թարգմ.՝ Զ. Բելլերյանի)

Արդ, քանի որ Օ. Մանդելշտամի (1891–1938 թթ.) այս տողերը միտքս եկան, անկարելի է նաեւ չհիշել Վալերի Բրյուսովի (1873–1924 թթ.) հայերին ուղղված բանաստեղծությունները.

Կանգնած եք դուք իրար ներհակ

Մեջտեղը երկու աշխարհների,

Եվ ասքերի խորքից անտակ

Կանչն եք լսում հին դարերի:

Անցել են ձեր երկրի սրտով

Հազար հողմեր մահախնչուն,

Եվ Կյուրոսը՝ խուլ որոտով,

Եվ Ալեքսանդրը շառաչուն...

Որքան լավ է ցույց տալ ժողովրդի մեծությունը համաշ-

խարհային իրադարձությունների առնչակցության մեջ: Հայ ժողովրդի ոգին այս տառապալից մասնակցության մեջ է, այլ ոչ թե քաղքենիական բարեկեցության:

Հանց մորատաշ քարն ալմադի՝

Ամբողջ շողքերը պահեց վառ,

Եվ վարդի բույրը Շիրազի,

Եվ հոմերյան ցուլը անմար...

(«Հայերին», թարգմ.՝ Ս. Տարոնցու)

Արարատի ստորոտին նույնիսկ աղքատ հովվի ցուպը մնանվում է արքայական մականի.

Քարոտ դաշտի մռայլ մուժուր

Հոտն է ահա ծերուկ հովվի,

Որի երկար փայտը անշուք

Նմանվում է գայիսունի...

(«Արարատի մոտ», թարգմ.՝ Ս. Տարոնցու)



Նույն այդ առումով է հայկական բնության մասին խոսում Նիկոլայ Տիխոնովը (1896–1979 թթ.).

Ժամանակի լինգով դաժան

Ջարդոտված լեռների գրկում

Շողշողում է Հայաստանը՝

Հեքիաթի խնձոր ոսկեգույն...

(«Հայաստան», թարգմ.՝ Զ. Գրիգորյանի)

Ոսկե խնձորը, այսինքն՝ արքայական մշանը՝ «տերությունը», եւ գավազանը ռուս բանաստեղծները համծնել են բազմաշարչար եւ իր մշանակալիությամբ երջանիկ Հայաստանին: Միթե սա արքայական նվեր չէ:

Ես ափսոսում եմ, որ քիչ եմ եղել մեր երկրի հանրապետություններում եւ չեմ կարող գրել դրանցից յուրաքանչյուրի մասին: Ամեն մեկն էլ ունի իր գեղեցկությունը, պարզապես պետք է տեսնել: Սակայն նույնիսկ բերված օրինակներից պարզ է դառնում հետեւյալը. երկրի բնապատկերը նույնքան ազգային մշակույթի տարր է, որքան մնացյալ ամեն ինչը: Հայրենի բնությունը չպահպանելը նույնն է, ինչ հայրենի մշակույթը չպահպանելը: Այն ժողովրդի հոգու արտահայտությունն է:

Շարունակելի

Ռուսերենից թարգմանությունը՝

Տ. Անդրեաս վրդ. ԵՋԵԿՅԱՆԻ

Բաբելոնյան աշտարակը

էջ 6

Ուշագրավ է, որ այդ գրքում առաջին անգամ մանրամասն նկարագրվում է «Բաբելոնյան աշտարակի սյունը»: Լոնդոնի համալսարանի (University of London) պրոֆեսոր եւ այդ նորատիպ աշխատության խմբագիր Էնդրյու Ջորջը (Andrew George) գտածոն բնութագրել է որպես «աստղ գրքերի երկնականարում»:

Թագավորի աջ ձեռքում կան մի մագաղաթ է, որը պարունակում է աշտարակի վերակառուցման վերաբերյալ նախագծեր, կան՝ մի գամաձեւ երկաթյա ձող: Արքայի դիմաց մի առասպելական շինություն է: Ինչպես ենթադրում են աշխատության հեղինակները՝ ելնելով Մարտին Շյոյենի հավաքածուի պատկերներից, այդ գտնված սյունաբեկորը ժամանակին զարդարել է հենց զիկկուրատի (հինմիջագետքյան պաշտամունքային կառույց) պատերը:

Այդ սեւ քարի վրա դրոշմված արձանագրությունները թվագրվում են Ք. ծ. ա. 604–562 թվականներով: Քարաբեկորի վրա պատկերված են Նաբուքոդոնոսոր Բ թագավորը (անունը ներկայացնում ենք Աստվածաշնչի համաձայն), որը Բաբելոնը կառավարել է ավելի քան 2500 տարի առաջ, եւ Բաբելոնի առասպելական աշտարակը:

Առավել ճշգրիտ լինելու համար մշենք, որ մեր առջեւ, իհարկե, ամսիջապես Բաբելոնյան աշտարակը չէ, այլ Էտեմնանկիի զիկկուրատը: Այս 91 մետրանոց շինությունը՝ հմագետները համարում են աստվածաշնչյան աշտարակի նախօրինակը:

Բարձունքում տեղակայված վիթխարի յոթհարկանի տաճարային շինությունը դիտվում է կողքից, նաեւ տեսանելի է շինության ներքին կառույցների հատակագիծը:

Արձանագրությունները պարզորոշ ներկայացնում են աշտարակը՝ որպես «Բաբելոնի մեծ զիկկուրատ»: Քարաբեկորին պատկերվածի համաձայն՝ Նաբուքոդոնոսոր արքան ինքն է պատմում շինարարության մասին. «Ես այն կառուցեցի ի գարմանս աշխարհի մարդկանց, ես բարձրացրի այն դեպի երկինք, դռներ պատրաստեցի դարպասի համար, այն պատեցի ձյութով եւ աղյուսներով»:

Ի դեպ, ըստ Էնդրյու Ջորջի, թագավորի՝ քարաբեկորի վրա փորագրվածը Նաբուքոդոնոսոր Բ-ի ընդամենը չորրորդ հայտնի դիմանկարն է. մյուս երեքը գտնվում են բաց երկնքի տակ եւ այժմ այնքան էլ լավ վիճակում չեն:

Գլխավորն այն է, որ այս քարաբեկորը պահպանել է Նաբուքոդոնոսոր Բ-ի գահա-

կալության ժամանակաշրջանին պատկանող առասպելական զիկկուրատի առաջին պատկերը: Հենց Նաբուքոդոնոսոր Բ-ի օրոք Էտեմնանկին, որն առավել վաղ էր կառուցվել, բայց հետո ավերվել է մի շարք վերակառուցումների էր ենթարկվել, մի վերջին անգամ էլ է վերակառուցվում՝ բավականին մեծ չափերի հասնելով այնպես, որ դառնում է Բաբելոնի ամենաբարձր շինությունը:

Քարի վրայի արձանագրությունները հուշում են նաեւ այն մասին, որ աստվածաշնչյան պատմության ծագումն առնչվում է տարբեր ժողովուրդների. նրանց, ովքեր հավաքվել եւ որոշել էին դեպի երկինք հասնող աշտարակ կառուցել:

Սեպագրում ասվում է. «Ես կենտրոնացրել եմ [բոլոր] երկրները... Ես կառուցել եմ իմ շինությունը ձյութով եւ [եփված աղյուսներով]: Ես ավարտեցի շինարարությունը՝ կառույցը դարձնելով նույնքան պայծառ, որքան [Լիբել]...» (թարգմ.՝ Էնդրյու Ջորջի. ի դեպ՝ Մարդուրի Հին Միջագետքի աստվածն էր, որին եւ նվիրված էր Էտեմնանկին):

Պաշտամունքային այս շքեղ կառույցը (ինչպիսին էին միջագետքյան մյուս զիկկուրատները եւս) իրենց աչքերով տեսնում էին հրեաները, որոնք գերի էին վերցվել Նաբուքոդոնոսոր Բ-ի զորքերի կողմից Երուսաղեմի՝ Ք. ծ. ա. 586 թվականին գրավումից հետո: Դեռեւաբար՝ լիովին հավանական է, որ

Էտեմնանկիի կառուցման իրական պատմությունը կարող է հիմք եղած լինել աստվածաշնչյան պատմւմի համար:

Նյութը պատրաստեց

ԱՆՆԱ ՉՈՎՍԵՓՅԱՆԸ

ՔՐԻՍՏՈՆՅԱ

ՉԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Արփիկե Զանգիկյան

Գրանցման վկայական՝ 624

խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 17.08.2023 թ.

Տպաքանակը՝ 1265